












# ভুবনমোহিনী

প্রতিভা ।



EDITED AND PUBLISHED BY  
NOBINCHANDRA MOOKHOPADHYA.

দ্বিতীয় ভাগ ।

আলবার্ট প্রেস্ ।

৩৭, মেছুয়াবাজার ষ্ট্রীট, কলিকাতা ।

শকাব্দ ১৭৯৯



বিদ্বজ্জনবান্ধব

শ্রীযুক্ত কুমার রাজেন্দ্রনারায়ণ রায় চৌধুরী

বাহাদুরের

হস্তে

•

এই গ্র

হৃদয়ের পবিত্র শ্রদ্ধা স্বরূপ উপহার

প্রদত্ত হইল ।

ভাদ্র, ১৭৯৯ শক ।





## সূচিপত্র ।

---

প্রবন্ধ ।	পৃষ্ঠা ।
অমুরোৎপীড়িতা সুরলক্ষ্মী	১
ভারত-রাজলক্ষ্মী	১১
লক্ষ্মী রাণীর হৃদয়োচ্ছ্বাস	২০
ইন্দ্রালয়-দর্শনে	২৯
পরাধীনের প্রণয়	৪৩
কে তুমি ?	৬০
মহাপ্রলাপ	৬৫
দার্শনিক সংসার	৭৩
সরস্বতী পূজা	৭৯
প্রশান-দর্শনে	৮৬
পিতৃতর্পণ	৯৫
অবনী-বৈচিত্র্য	১০২
আশা-মরীচিকা	১১৩
পহার	১২০



# ভুবনমোহিনী প্রতিভা

অসুরোৎপীড়িতা সুরলক্ষ্মী

১

এস, সুরবাসি, প্রাণের সোদর !

এস, প্রাণ ভরি' করি আলিঙ্গন ;

এস, ভাই, সবে এক প্রাণে মিশি,

এক দুঃখে করি অশ্রু বিসর্জন !

২

এক স্মৃথে ভাসি, এক মুখে হাসি,

এক বাক্যে সব প্রকাশি বেদনা ;

এক মর্মে গলি, এক প্রেমে ঢলি,

এক মস্তে হই দীক্ষিত ; সাধনা

৩

এক প্রতিজ্ঞায়, একই উদ্দেশে ;

একের উদ্বিগ্নে অপারে বিকল ;

একের কারণে, সহস্র পরাণে

সাধিব প্রতিজ্ঞা—সাধিব মঙ্গল ।

৪

এস, ভাই ! এস, এক মদে মাতি,  
 এক পথে সবে করি বিচরণ ;  
 এক উৎসাহেতে হই উৎসাহিত,  
 এক বাক্যে করি প্রতিজ্ঞা সাধা

৫

এক বলে বলী, এক দস্তে চলি,  
 এক হুঙ্কারে হুঙ্কারি সকলে ;  
 এক পরিণাম, এক পথে গতি,  
 এক পরকাল নিয়তি-শৃঙ্খলে

৬

শৃঙ্খলিত নিত্য ; এক পরমাণু,  
 এক রক্তে মাংস, এক বীৰ্য্যে বল,  
 একই সঙ্কল্প সাধিব সাধিব,  
 গাইব গাইব বিজয়-মঙ্গল !

৭

লভিব লভিব বাঞ্ছা-কল্প-ফল,  
 'উপাড়ি' স্বমেরু ভাসা'ব সাগরে,  
 বজ্র-বৃষ্টি-শিলা-বাত-উল্কাপিণ্ড  
 বক্ষঃস্থল পাতি' স'ব অকাতরে !

৮

এস, ভাই ! দেখ, অন্তর্ভেদি-দৃষ্টে  
মরমে মরমে জ্বলে কি দহন !  
দেখ, ভাই ! দেখ, হৃদয়-ভিতরে  
অনলের কালি পড়িতে কেমন !

৯

এস, ভাই ! মথি অদৃষ্ট-সাগর ;  
উঠিবে উঠিবে অমৃত-আধার ;—  
এস, স্নানপানে হইয়া অমর,  
জয় জয় শব্দে কাঁপাই সংসার !

১০

সাগরে গরল উঠিতেও পারে ;  
উঠুক গরল—ভয় কি তাহাতে ?  
দেবের অমৃত দেবতার পা'বে,  
অশ্বরের ভক্ষ্য ল'বে অশ্বরেতে ।

১১

বাঁটিব অমৃত নিজ হস্তে আমি,  
এক বিন্দু নাহি হ'বে অপচয় ;  
অশ্বরে অর্পিয়া গরলের ভাণ্ড,  
কৌশলে নাশিব শত্রু সমুদয় ।

১২

এই পাগলিনী এলাইয়া বেণী,  
 বসিল শ্মশানে শব-সাধনায় ;  
 যা' করে করালী, যা' করে মা কালী,  
 সাধিব মঙ্গল স্থিরপ্রতিজ্ঞায় !

১৩

যত দিন এই অদৃষ্ট-জলধি  
 লজ্জিতে না পারি, তত দিন আর  
 ফিরিব না গৃহে—বাঁধিব না কেশ—  
 আহার বিহার বিলাস ব্যভার

১৪

করি' পরিহার রহিব শ্মশানে !  
 সন্ন্যাসিনী বেশে সাধিব সাধনা ;  
 ত্যজিয়া বসন, পরিব বন্ধন,  
 মাখিব বিভূতি—করি'ছি বাসনা !

১৫

ত্রিশূল কেবল সহায় শ্মশানে !  
 নিশা দ্বি-প্রহরে ঘোর অন্ধকারে  
 মহাঘোরে মাতি' গন্তীরে গাইব ;  
 ছেরিব স্থনীল নীরদ অশ্বরে

ভুবনমোহিনী প্রতিভা ।

১৬

নীরদবরণী, আলুয়িত বেণী,  
উলঙ্গী, অধরে হাসি বিকসিত ;  
স্থিরশান্তি-মাথা সদানন্দময়ী  
স্থিরসৌদামিনী ! সুধাংশু-জড়িত

১৭

নীলাজ বদনে সুধার আত্মাণে  
প্রমত্ত ভ্রমর ভ্রমরী বাক্ষারে !  
মুক্তমেঘকেশী শান্তিময়ী শ্যামা  
বরাভয় দিয়া তুমিবে আমারে !

১৮

উঠ, ভাই ! বুক বান্ধ বৈষ্যগুণে,  
আশ্বাসে শীতল হইয়া সকলে ;  
এক দুঃখে গলি, করি' গলাগলি,  
এস, ভাই ! সব কাঁদি প্রাণ খুলে !

১৯

ত্যজ আত্মপর, বিদ্বেষ, মূঢ়তা,  
ত্যজ অভিমান, ভীৰুতা, আলস্য,  
দাসত্ব-শৃঙ্খল ছিন্ন করি' ফেল,  
কারামুক্ত হও ত্যজিয়া ঔদাস্য !



২০

এস, কার্য্য-ক্ষেত্রে হই অবতীর্ণ,  
 সত্য-ক্ষেত্রে বুনি বিবেকের বীজ ।  
 সাহস-সলিল সিঞ্চি' অবিরাম  
 চতুর্বর্গ ফল করি সজীবিত !

২১

দেবের সন্তান—দেবতা আমরা  
 আমাদের তুল্য আছে কে সংসারে ?  
 আমাদের সঙ্গে সমকক্ষতায়  
 জিনেছে কে কবে ভুবন ভিতরে ?

২২

এত কোটি দেবে একে একে যদি  
 খসা'য়ে স্মেরু-প্রস্তর কেবল  
 সাগরেতে ফেলি, হ'বে সমভূমি  
 স্মেরুর শৃঙ্গ সাগরের জল !

২৩

আকাশের তারা একে একে যদি  
 গণি সকলেতে, কুলায় কি তবে ?  
 সাগরের জল একৈক গণ্ডুষ  
 পান করি যদি, সাগরো শুকা'বে !

২৪

প্রত্যেকে যদ্যপি দীর্ঘ মরু-ক্ষেত্রে  
তুলি মুষ্টি মুষ্টি বালুকা, তা' হ'লে  
মরুভূমি হ'বে গভীর নিখাত !

প্রত্যেকের বিন্দু বিন্দু অশ্রু জলে

২৫

পূর্ণ হ'য়ে যা'বে সিন্ধু, গোদাবরী !  
প্রত্যেকের দীর্ঘ নিশ্বাসে নিশ্বাসে  
প্রলয়ের ঝড় সৃষ্টি হ'য়ে, সিন্ধু,  
সুমেরু, মেদিনী কাঁপবে সম্রাসে !

২৬

উঠ ভাই ! চক্ষু মেল, প্রিয়তম !  
কতকাল র'বে মোহ-নিদ্রাগত ?  
কতকাল হৃদে পুষিবে বশিচক ?  
কতকাল বিষে র'বে জর্জরিত ?

২৭

কতকাল বক্ষে লুকা'বে অনল ?  
কতকালে হ'বে অমৃত উদ্ধার ?  
কতকালে সবে হ'বে সজীবিত ?  
কতকালে নিদ্রা ভাঙ্গিবে তোমার ?

২৮

কতকালে চক্ষু পা'বে দৃষ্টি-শক্তি ?

কতকালে শ্রুতি হ'বে সচেতন ?

কতকালে নিজ অস্তিত্ব বুঝিয়া

জাতীয় উৎসাহে ঢালিবে জীবন ?

২৯

কতকাল আর মানস-আকাশে

র'বে চন্দ্রসূর্য্য তিমিরে মগ্নিত ?

কতকালে রাত্ৰ চণ্ডাল নিশ্চয়

দেব-বজ্রাঘাতে হইবে দগ্নিত ?

৩০

কতকাল হিংসা, বিদ্বেষ রাক্ষসী

করিবে আপন প্রভুত্ব বিস্তার ?

কতকাল আর আলস্য-জড়তা

জড়িত থাকিবে জীবনে তোমার ?

৩১

কয়টা র আছে বা সংসারে ?

কি করিতে পারে দানবে দেবের ?

আত্মবিস্মৃতিতে আচ্ছন্ন দেবতা,

তাই' এ দুর্দশা, ভাই ! তোমাদের ।

৩২

এক মাতৃগর্ভে জনমিয়া সবে  
অজ্ঞান-তিমিরে অন্ধ হইয়াছ ?  
সোদরে সোদরে নাহিক সম্প্রীতি !  
হিংসি' পরস্পারে অধঃপাতে গেছ ?

৩৩

এক রক্তে জন্ম, এক বীৰ্য্যে তনু,  
এক উদ্দেশ্যেতে জন্মে'ছ সকলে ;  
এক অদৃষ্টেতে আদিষ্ট হইয়া  
অন্য পথে গিয়া ডুবিলে ?—ডুবা'লে ?

৩৪

ছি ছি, দেব ! মনে হয় না কি ঘৃণা ?  
ভুলি' ভ্রাতৃত্বাব, ভুলিয়া আপনা,  
স্বর্গবাসী হ'য়ে ডুবি'ছ নরকে ?  
সহি'ছ দৈত্যের নিশ্চয় তাড়না ?

৩৫

দেখ দেখি স্মরি' পূর্বের কাহিনী—  
কি ছিলে, কি হ'লে, কি হ'বে কালেতে ?  
গোটা কত দৈত্যে কেড়ে নিল স্বর্গ  
স্বরের ঔরষ সংসারে থাকিতে ?

৩৬

এক বিন্দু রক্ত থাকিতে হৃদয়ে  
 কে পারে দেখিতে হেন অত্যাচার ?  
 ধিক্ ধিক্, দেব ! ধিক্ সুর বংশে !  
 জানি না কি ইচ্ছা ইথে বিধাতার !

৩৭

জানি না এরূপে কত কাল রবে ?  
 হোক্ স্বর্গপুরী ঘোর রসাতল !  
 যা'ক্ বিশ্ব হ'তে 'দেব' নাম ধু'য়ে ;  
 চাহি না—চাহি না—চাহি না মঙ্গল !

৩৮

ছি ! ছি ! এ কি কথা ? এই কি নিয়তি ?  
 স্বর্গের শাসন অসুরের করে ?  
 বৈজয়ন্ত ধামে অসুরে বিহারে  
 দেবতার বন্দী দৈত্য-কারণারে ?

৩৯

ছি ! ছি ! রে বিধাতা ! তোমার লিপির  
 এত বিচিত্রতা ?—এত বিড়ম্বনা ?  
 রাজত্ব ত্যজিয়া দাসত্ব !—তথাপি  
 পাপাত্মা দৈত্যের আশা মিটিল না ?

৪০

আর কি বলিব ? বলিতে কি আছে ?  
ব'লে ব'লে কণ্ঠ হ'য়েছে বিকল !  
দীর্ঘ নিশ্বাসেতে শুকা'য়েছে বক্ষ,  
কেঁদে কেঁদে আর চক্ষে নাই জল !

ভারত-রাজলক্ষ্মী ।

কৃষ্ণ চতুর্দশী ;—ভয়ঙ্করী নিশি !  
ঘোর অন্ধকারে ঢাকা দশ দিশি !  
নৈশ নীলান্বরে নীল কাদম্বিনী  
গম্ভীর গরজে ;—কম্পিত মেদিনী !  
হাঁসি'ছে দামিনী বিকাশি' দশন !  
ঘোর বজ্র-রাবে বধির অবণ !  
ঝলকে ঝলকে তপ্ত তেজোরশি  
ক্ষরি'ছে,—পুড়ি'ছে সৃষ্টি ; দশ দিশি  
চকিতে চকি'ছে ;—পুন অন্ধকার !  
শূন্য, জল, স্থল সব একাকার !  
কোথা ধরাতল ?—কোথায় আকাশ ?  
কোথা সৃষ্টি-চিহ্ন মানব আবাস ?

কোথায় কান্তার—কোথায় প্রান্তর ?—

কোথায় ভূধর ?—কোথায় সাগর ?—

কোথা নদ-নদী-তরু-তৃণ-দল,

কোথা গ্রাম-পল্লী-নগর সকল ?

কোথা যে কি, নাহি হয় অনুভব,

অন্ধকারে যেন মুছে গেছে সব !

কুটীরে দরিদ্র, মঠে যোগিবর,

পান্থালে পান্থ, সৌধে নরেশ্বর,

দুর্গে সেনাপতি, বন্দী কারাগারে,

গৃহেতে গৃহস্থ, দৌবারিক দ্বারে,

জননীর কোলে সন্তান সন্ততি,

পতি-হৃদয়েতে পত্নী গুণবতী,

কোটরে বিহঙ্গ, কেশরী কন্দরে,

শাখে শাখা-মৃগ, ভূজঙ্গ বিবরে,

জলে জল-জন্তু, স্থলে স্থল-চর,

বনে বন-বাসী, আকাশে খেচর,

যেখানে যে আছে—সকলে শঙ্কিত,

সকলে বিপন্ন, সকলে স্তম্ভিত !

ভীম ঘনঘটা ঘোর গরজনে

ঘোর বজ্র-নাদে, ঘন ভূকম্পনে

উথলে সমুদ্রে, টলে চরাচর,  
 খসে শৈল শৃঙ্গ, মর্ মর্ মর্  
 শব্দে প্রভঞ্জন ভাঙ্গে বৃক্ষদল !  
 মহাপ্রলয়েতে ত্রৈলোক্যমণ্ডল  
 গেল স্রসাতল ! গেল এইবার  
 গেল রে গেল রে সৃষ্টি বিধাতার !  
 উন্মত্ত প্রকৃতি, উন্মত্ত পবন,  
 উন্মত্ত মেঘের উন্মত্ত গর্জন,  
 উন্মত্ত করকা বৃষ্টি ঝন্ ঝমে,  
 উন্মত্ত বিদ্যুৎ চকে চন্ চমে !  
 উন্মত্ত অশনি উগারে অনল,  
 উন্মত্ত হুঙ্কারে ফাটে নভস্তল !

১

এ হেন ভীষণ দুর্ভোগ নিশীথে  
 কান্দিতেছে কেবা দক্ষিণ শ্মশানে ?  
 শুন স্থির হ'য়ে ! শুন—ওই শুন  
 স্বপ্নবৎ শূনা যায় ক্ষণে ক্ষণে !

২

ফের শুন, ঘোর বিকট হুঙ্কার  
 চীৎকার চিক্রাহি হ'তেছে ভীষণ !

২



বিশ্ব কম্পমান, বিশ্ব শঙ্কাময় ;  
শঙ্কার শঙ্কিত হ'তেছে জীবন !

৩

ব্যাপার কি ? চল দেখিগে কল্পনে,  
সর্বত্রগামিনী সর্বত্রদর্শিনী,  
তুমি ত্রৈলোক্যের জীবন্ত পুতুল  
তুমি ত্রৈলোক্যের আদর্শরূপিণী !

৪

তোমার রূপায় এ ভবমণ্ডলে  
অদৃশ্য, অশ্রুত কি আছে আমার ?  
তোমার রূপায় পৃথিবীর মাঝে  
কা'রে বা ডরাই ? আশঙ্কা কাহার ?

৫

চলিছু, কল্পনে, শ্মশান উদ্দেশে  
হৃদয়-মন্দিরে ব'স গো আমার ।  
সঙ্কটে পড়িলে রক্ষা ক'র যেন,  
কল্পনে ! কেবল ভরসা তোমার !

৬

শৈশবেতে তুমি ক্রীড়া-সহচরী,  
যৌবনের সখী প্রোঢ়ে প্রিয় দূতী,

বার্দ্ধক্যে বয়স্মা মরণের সঙ্গী,  
জন্মান্তরে তুমি অগতি সদগতি !

৭

কল্পনে গো ! ওই শ্মশান সৈকত !  
দেখে কি যে হ'ল,— বর্ণিব কি ক'রে ?  
নিষ্পন্দ হৃদয়, কণ্টকিত দেহ  
শিহরিল রক্ত প্রতি শিরে, শিরে !

৮

তিমিরে ত্রৈলোক্য গভীর আবৃত !  
গভীর ভীষণ শ্মশান ভুবন !  
গভীর ভাবের আধার যেন রে,  
গভীর হৃদয়ে আনন্দ-কানন !

৯

গভীর গর্জনে জ্বলিতেছে চিতা,  
পুড়ি'ছে অনন্ত কোটি প্রাণী তায় !  
শৃগাল কুকুরে করে গণ্ডগোল ;  
কবন্ধ দানাতে নাচিয়া বেড়ায় ।

১০

শাঁখিনী, ডাকিনী, প্রেতিনী, পিশাচী,  
চিৎকার 'চিক্রাহি' ছাড়ি'ছে সঘনে ।

চিতা মাংস লয়ে করে লোফালুফি,  
কড়মড় অস্থি চিৰায় দশনে !

১১

কাড়াকাড়ি করে, ছুটে উভরড়ে,  
হাঁসে, নাচে, গায় আনন্দ অপার ।  
মুখে রক্ত-ধারা, হাতে সুরা-পাত্র  
দাঁড়া'য়ে ভৈরবী কাতারে কাতার !

১২

লক্ষ লক্ষ ভীম জটাজুটধারী  
কাপালিক বসি' ছিন্ন-শীর্ষ শবে  
করিতেছে ধ্যান ;—ভয়ঙ্কর দৃশ্য !  
খায় চিতা মাংস—প্রমত্ত আসবে !

১৩

অদূরে ভীষণদর্শন এ হ'তে  
ওই দেখ, হেন দেখ নাই আর,  
বসি' ব্যাঘ্রচর্ম্মে উলঙ্গ পুরুষ  
ঘোরকৃষ্ণতনু প্রকাণ্ড ব্যাপার !

১৪

আসব-আলস্যে আরো ভয়ঙ্কর,  
রক্ত লোল-চক্ষু ঘুরি'ছে কপালে !

করে সুরাপাত্র, মুখে রক্তধারা,  
প্রতি কটাক্ষেতে বিদ্যুৎ বিভলে !

১৫

বিকট দুর্গন্ধ উঠি'ছে সর্বাস্থে !  
প্রতি লোমকূপে জীবন্ত নরক !  
প্রতি শ্বাসে ক্ষরে অনল-স্ফুলিঙ্গ,  
রক্তলোলজিহ্বা করে লক্ লক্ !

১৬

দীর্ঘ জটাভার, দীর্ঘ শ্মশ্রু-রাশি,  
দীর্ঘ বঁপুঃ স্পর্শ করি'ছে গগন ;  
সন্মুখে হ'তেছে লক্ষ নরবলি,  
লক্ষ রমণীর সতীত্বহরণ !

১৭

একি ভয়ঙ্কর ! একি নিষ্ঠুরতা !  
একি পাপাচার, পৈশাচিক রীতি !  
গেল যে জগৎ, রসাতল গেল,  
গেল এইবার, গেল সৃষ্টি স্থিতি !

১৮

কেও ভীমকায় বসি' প্রেতভূমে ?  
চেন কি উহারে—চেন কি মানব ?

নহে যক্ষ, রক্ষ, গন্ধর্ব্ব, দেবতা,  
নহে ভূত, প্রেত, পিশাচ, দানব ।

১৯

নিষ্ঠুর তান্ত্রিক রীতি ওর নাম,  
বড়ই নিশ্চয়—বড় পাপাচার !  
ওরি অত্যাচারে হ'য়ে উৎপীড়িতা  
উন্মত্ত প্রকৃতি ছাড়ি'ছে হুঙ্কার !

২০

ওই দেখ দূরে অপূর্ব্ব ষোড়শী,  
ভারতের রাজলক্ষ্মী ওঁর নাম !  
ওরি উৎপীড়নে হ'য়ে উৎপীড়িতা  
ছাড়িয়া যেতেছে আৰ্য্যদের ধাম !

২১

বহুদিন হ'তে ছিল আৰ্য্য-গৃহে  
মমতা-বন্ধন কাটিতে কি পারে ?  
যায় যায় আর চলে না চরণ,  
স্নেহের আবেগে কাঁদে উচ্চৈঃস্বরে !

২২

রাজগৃহ হ'তে রাজ-লক্ষ্মী যায়,  
দেখিয়া শোকেতে কান্দি'ছে প্রকৃতি,

ঝরে অশ্রুধারা, ক্ষরে শিলারূপি,  
অঁধারিয়া পথ রুদ্ধিতেছে গতি !

২৩

চমকি' বিদ্যুৎ প্রদর্শি'ছে শঙ্কা,  
হুঙ্কারি' জলদ, হুঙ্কারি' পবন  
জাগাই'ছে আর্ষ্যে, কিন্তু কে তা' শুনে ?  
ভক্তির কুহকে মুগ্ধ আর্ষ্যগণ !

২৪

মুক্তির মোহেতে নিদ্রাগত আর্ষ্য,  
কোথা' কি হ'তেছে কে দেখে চাহিয়া ?  
দুর্দশা-সাগরে ডুবা'য়ে সংসার  
রাজ-লক্ষ্মী যায় ভারত ছাড়িয়া !

২৫

ঘোর পাপাচার, ঘোর নিষ্ঠুরতা,  
কোমল হৃদয়ে সহিতে কি পারে ?  
নিরুপায় ভাবি' আর্ষ্যরাজলক্ষ্মী  
আত্ম সমর্পিল যবনের করে !

লক্ষ্মীরানীর হৃদয়োচ্ছ্বাস ।

১

এস যুবরাজ ! দাঁড়াও দেখি হে !  
 বলি ছুট কথা যাইবার কালে;  
 বলি ছুট কথা হৃদয় খুলিয়া,  
 অবজ্ঞা ক'র না অভাগিনী ব'লে !

২

ভারত দেখিয়া যেতেছ কি গৃহে ?  
 ভারত কি দেখা হইল তোমার ?  
 যাইবার কালে একবার এস,  
 দেখে যাও ঘোর অন্ধকারাগার !

৩

দেখে যাও এই অভাগীর দশা !  
 দেখে যাও হৃদে জ্বলে কি অনল !  
 দেখে যাও মর্মে জাগি'ছে কি শোক !  
 দেখে যাও মম নয়নের জল !

৪

দেখে দীনহীনা ঘৃণা ক'র না'ক,  
 এরূপ দুর্দশা হ'য়েছে সম্প্রতি !

এখন হ'য়েছি তরঙ্গের তৃণ,  
 ছিনু আমি পূর্বে নন্দন-ব্রততী ।

৫

ইতিপূর্বে ছিনু অতি ভাগ্যবতী,  
 সৌভাগ্যের ক্ষেত্র ছিল পরিসর ।  
 ছিনু বরদার রাজরাজেশ্বরী !  
 স্বামী ছিল মম রাজ-রাজেশ্বর !

৬

কিছুই না জানি, কিছুই না শুনি,  
 বিনা মেঘে হ'ল অশনি সম্পাত !  
 নৈতিক বিচারে, সত্যের চক্রেতে  
 সুখ-স্বপ্ন ভগ্ন হ'ল অকস্মাৎ !

৭

পূর্ব দিন স্বামী, রাজা সিংহাসনে ;  
 পরদিন হ'ল বন্দী কারাগারে !  
 পূর্ব দিন ছিনু রাজ-রাজেশ্বরী,  
 পর দিন হৈনু অভাগী সংসারে !

৮

আমারি রাজত্ব, আমারি সর্বস্ব,  
 মম অন্তঃপুর, প্রাসাদ ভবন,



রাত্রি প্রভাতেতে আমি কেহ নই ;  
বা'র হ'তে হ'ল পরের মতন ! ।

৯

সূর্যের উত্তাপ দেখি নাই কভু,  
দেখি নাই কভু বাহির তোরণ,  
অন্তঃপুর ছাড়ি' এক পদ কভু  
করি নাই আমি অন্যত্র গমন !

১০

আজি অভাগিনী বাহিরিয়া পথে,  
সকল সমক্ষে দাঁড়া'য়েছে আসি' ;  
আজি অভাগিনী তোমার সাক্ষাতে  
একে একে সব ক'বে দুঃখ রাশি !

১১

তোমার সাক্ষাতে গা'বে দুঃখ-গীত,  
নাই লজ্জা, নাই জীবনের ত্রাস !  
নাই কুল মান, নাই অবরোধ,  
নাই উদরান্ন, নাই গৃহবাস !

১২

দেখ, এই দেখ, এক বস্ত্র ভিন্ন  
দ্বিতীয় বসন নাহিক অঙ্গের,

দেখ, যুবরাজ ! রাজ-প্রতিনিধি,  
কাঙ্গালিনী মোরে করেছে পথের !

১৩

দেখ, যুবরাজ ! হ'য়েছি রাক্ষসী !  
দেখ রুম্ম কেশ, কঙ্কালের ভার !  
আমিই আছি নু বরদার রাণী,  
দেখিয়া, এখন চিনে সাধ্য কা'র ?

১৪

দেখ, যুবরাজ ! দেখ মোর দশা,  
এই এক দৃশ্য দেখ ভারতের !  
দেখেছ আহ্লাদে হাস্তের তরঙ্গ,  
দেখ হাহাকার দারুণ শোকের !

১৫

যুবরাজ ! তুমি দীর্ঘজীবী হও,  
অবলার দিব্য লাগে হে তোমাতে ।  
কায়মনঃপ্রাণে পূজিব তোমায়,  
করি নিমন্ত্রণ, এস কারাগারে !

১৬

আসিয়া এ দেশে কত কি দেখিলে,  
বিবিধ বিধানে হইলে হে সুখী !

বিবিধ বিধানে হইলে সন্তুষ্ট,  
ভারতের স্বপ্ন সৌভাগ্য নিরখি' !

১৭

নানামতে কত পাইলে সম্মান,  
পাইলে প্রণামী, স্তুত্যাতি, সাবাসি,  
যাইবার কালে বিষাদ-কাহিনী,  
শুনে যাও দুট কারাগারে আসি' !

১৮

দেখিলে বিবিধ আনন্দ-উচ্ছ্বাস,  
শোকের উচ্ছ্বাস দেখ একবার,  
দেখিলে কাশ্মীর স্বর্গীয় ভবন,  
'নরক দেখিয়া যাও বরদার !

১৯

দেখিলে বিচিত্র প্রাসাদ ভবন,  
দেখে যাও যোর অন্ধকারাগার !  
দেখিলে বিচিত্র আলোকের শোভা,  
দেখ পুনরায় নিবিড় আঁধার !

২০

শুনিলে বন্দনা, বাদ্য সুললিত,  
সঙ্গীতে নীতল করিল পরাগ ;

যাইবার কালে এস কারাগারে,  
শুনে যাও উষ্ণ সন্তাপের গান !

২১

দেখিলে বিবিধ অনল উৎসব,  
দেখ হে আমার হৃদয়-অনল  
জ্বলি'ছে কিরূপে, ইহার কি জ্বালা,  
এস হে দেখাই চিরি' বক্ষঃস্থল !

২২

শুনিয়াছি তুমি পর দুঃখ বুঝা,  
শুনিয়াছি তুমি দয়ার সাগর,  
আজ তব দয়া বুঝিতে পারিব,  
এস দেখি মোর সঙ্গে, গুণাকর !

২৩

আমার প্রাণেশ বঞ্জন যেখানে,  
এক রাত্রি তথা হইবে থাকিতে ।  
কারাগৃহে তোমা পূজিয়া আমরা,  
প্রাণ উপহার দিব তব হাতে !

২৪

চল কারাগারে, চল মোর সঙ্গে,  
চল দেখা দিতে বরদা দৈবরে ;

অন্ধকারাগৃহে নিরবে একাকী,  
প্রাণেশ আমার বঞ্ছন কাতরে !

২৫

যুবরাজ ! তুমি এসেছ ভারতে,  
আনন্দিত সবে দেখিয়া তোমাকে ;  
সকলের মুখে হাসির তরঙ্গ,  
কেবল আমরা পুড়ি মনোদুঃখে !

২৬

যুবরাজ ! আমি দুঃখিনী অবলা,  
জানি না আদর সম্মানের রীতি ;  
জানি না কি হ'লে হইবে সন্তুষ্ট,  
সন্তুষ্ট করিতে আছে কি শক্তি ?

২৭

নাই স্বর্ণ রত্ন হীরা মুক্তা মণি,  
কি দিয়া সন্তুষ্ট করিব তোমায়  
দয়াময় ! শুদ্ধ দয়া করি' যদি  
পদার্পণ কর নাথের কারায় !

২৮

যুবরাজ ! এস দেখে যাও চক্রে,  
তোমাদের হৈতে কি হইয়েছে মোর !

তোমাদের হৈতে এই ভারতের,  
ঘটে'ছে কেমন বৈচিত্র্য কঠোর !

২৯

তোমাদের হৈতে মহারাষ্ট্রপতি,  
হারাইয়া রাজ্য, বন্দী কারাগারে!  
তোমাদের হৈতে আমি লক্ষ্মী রাণী  
পথের কাঙ্গালী হয়েছি সংসারে !

৩০

তোমাদের হৈতে হ'য়েছে সকলি,  
বাকি কিছু নাই হইবার আর ;  
বাকি আছে প্রাণ, এস' যুবরাজ !  
তাও আজ দিব লও উপহার !

৩১

কোথা নর্থব্রক ! তুমি শুদ্ধ এস,  
তুমিই করে'ছ দুর্দশা এমন !  
তুমিই দিয়াছ চাঁদেতে কলঙ্ক,  
বরদার ভাণ্ডে তুমিই শমন !

৩২

তুমিই নির্মল ব্রিটিশ গৌরবে  
কলঙ্ক-কালিমা করেছ অর্পণ ;

ভারতের চিহ্ন যত দিন র'বে,  
উড়িবে তোমার স্মকীৰ্ত্তি-কেতন !।

৩৩

নর্থব্রুক ! এই চলিলে ত দেশে,  
সম্বন্ধ ঘুচা'য়ে ভারতের সনে,  
ক'দিনের জন্য এসেছিলে এথা,  
যাইতে হ'বে যে ভাবনি কি মনে ?

৩৪

নর্থব্রুক ! এসে ছু'দিনের জন্যে  
চির দিন তরে কিনিলে অখ্যাতি !  
ব্রিটিশ শাসনে ঘুচা'লে বিশ্বাস,  
রাখিলে সংসারে সভ্যতার খ্যাতি !

৩৫

দিন, মাস, যুগ সকলই যায়,  
যায় ধন, জন,—কিছুই থাকে না ;  
স্মকীৰ্ত্তি, কুকীৰ্ত্তি এই মাত্র থাকে,  
এই মাত্র হয় সৰ্ব্বত্র ঘোষণা !

৩৬

দিব্য কীৰ্ত্তি রেখে চলিলে স্বদেশে,  
আশীৰ্ব্বাদ করি দীর্ঘজীবি হও ;

আমায় কাঁদা'য়ে স্বেথে থে'ক তুমি  
বিদেশীয় বন্ধু !—অন্য তুমি নও !

৩৭

যুবরাজ ! শোক বুঝে'ছ কি মোর ?  
দেখিতে পেয়েছ হৃদয়-অনল ?  
হ'লে কি দুঃখিত অভাগীর দুঃখে ?  
নিভা'তে পার কি এই কালানল ?

৩৮

যুবরাজ ! বড় যন্ত্রণা !—ইহার  
জ্বালায় অস্থির ! ভয় হয় বুক !  
যুবরাজ ! এই দেখে যাও চক্ষে,  
দেখিলে অনেক শান্ত হবে দুখ !

ইচ্ছালায় দর্শনে।

। কিবা—

হেরি রে এ যে সকলি সুন্দর !  
সকলি নবীন মনোহরতর,  
সকলি স্বেথের, সকলি প্রেমের,  
সকলি অপূর্ব মাধুরি ।  
সকলি আহ্লাদ, সকলি আনন্দ !



সকলি প্রফুল্ল, সকলি সুগন্ধ !  
 সকলি যথেষ্ট, সকলি অসংখ্য,  
 সকলি সচ্ছল ;—আমরি !

আহা !

মরি রে, এ যে নবীন জগতে  
 নব অভ্যুদয় দেখিতে দেখিতে ;—  
 নবীন শীতল সরস পবন,  
 নব রবি, শশী, নবীন গগন,  
 নবীন নক্ষত্র, নব গ্রহদল,  
 নবীন শ্যামল স্বচ্ছ ধরাতল !  
 নবীন উদ্ভিজ্জ, নবীন শেখর,  
 নবীন সরিৎ, নবীন সাগর !  
 নবীন প্রান্তর, নবীন কানন,  
 নবীন জগতে নব জীবগণ,  
 নবীন তরুর নবীন শাখায়  
 নবীন পল্লব, নব বৃন্ত, তায়  
 নবীন নবীন কুসুম বিকাসে,  
 নব পরিমল নবীন বাতাসে  
 নবীন প্রদেশে বিতরি'ছে ধীরে !  
 নবীন বসন্ত বিকাশ, কিবা রে

নবীন মিকুঞ্জে নব পিকবধু  
 কুহরে পঞ্চমে ছড়াইয়া মধু ।  
 নবীন লতিকা নবীন বরণে  
 নবীন অমিয় ফল আভরণে  
 নবীন সুন্দর সেজেছে কেমন !  
 আহা ! কি শোভা রে কোথা এলে মন ?

এয়ে—

সকলি নবীন, সকলি অতুল,  
 সকলি সকল সুন্দরের মূল ।  
 সকলি সুখের, সকলি প্রেমের,  
 সকলি অপূর্ব মাধুরি !  
 সকলি আহ্লাদ, সকলি আনন্দ,  
 সকলি প্রফুল্ল, সকলি সুগন্ধ,  
 সকলি যথেষ্ট, সকলি অসংখ্য,  
 সকলি সচ্ছল নেহারি !

এথা—

নাই রোগ, শোক, জন্ম, মৃত্যুভার,  
 নাই ক্ষুধা, তৃষ্ণা, ক্রোধ, অহঙ্কার,  
 নাই আত্মগ্লানি, নাই শত্রুভয়,  
 নাই পক্ষপাত ( সরলতাময় ! ),

নাই হিংসা, ঘেঁষ, দন্ত, অভিমান,  
 নাই পরনিন্দা, পর-অপমান,  
 নাই শান্তিভঙ্গ, রাজভয় নাই !  
 নাই দণ্ডভয়, করপীড়া নাই,  
 নাই দরিদ্রতা, নাই হাহাকার,  
 নাহিক দাসত্ব-প্রভুত্ব-বিচার !  
 নাই অধীনতা—সকলে স্বাধীন,  
 সকলে সুন্দর সকলে প্রবীণ,  
 সকলে আপন হৃদয়ের রাজা,  
 সকলের কিবা বক্ষঃস্থল তাজা !  
 সকলেই যুবা, সকলে রসিক,  
 সকলে ভাবুক প্রাজ্ঞ সমধিক,  
 সকলেই এক, এক প্রাণমন,  
 এক কলেবর, একই গঠন,  
 একতা, বীরতা, সমতা, সদৃজ্ঞানে  
 হৃদয়ের স্ফূর্তি প্রকাশে বদনে,—  
 নয়নে ললাটে নিকলে প্রতিভা,  
 বর্ণ যেন তপ্ত কাঞ্চনের আভা ;  
 অপূর্ব সৌরভ প্রকাশি'ছে গাত্রে,  
 সুধার আবেস প্রকাশি'ছে নেত্রে ;

মধুপানে মত্ত, প্রেমে ডগ মগ ।

ভাবে ঢল ঢল ধর গো, ধর গো !

কল্পনে ! আশায় আনিলে কোথায় !

এরে বলে কোন্ নগরী ?

এ আবার কোন আনন্দ-বাজার ?

এ আবার কোন্ মাধুরী ?

এযে, এক ছাঁচে ঢালা, একই গঠন,

অসংখ্য অনন্ত প্রাসাদ ভবন ;

কাঞ্চনের কড়ি, রজতের ইট,

মুকুতার চুণে রতনে নির্মিত ;

হীরকের দ্বার, অলিন্দ ঝলকে,

হীরার কলস ধক্ ধক্ ধকে ;

অতুল্য বৃহৎ হর্ম্যরাজি-শিরে

বিচিত্র বসনে মাণিক ঝালরে

উড়ে সারি সারি বিচিত্র নিশান,

অবারিত দ্বারে নাই দ্বারবান,

কোন স্থানে যেতে কারো বাধা নাই,

যাহারে নেহার অভিন্ন সবাই ;

প্রতি কক্ষদেশ অপূর্ব সজ্জিত,

অপূর্ব রঙ্গেতে অপূর্ব রঞ্জিত ;

অপূর্ব বসনে অপূর্ব ভূষণে  
 অপূর্ব রমণী রূপেয় কিরণে  
 কক্ষে কক্ষে খেলে—স্থির সৌদামিনী—  
 কক্ষে কক্ষে যত স্থির যৌবনী  
 নাচি'ছে হাসি'ছে গাই'ছে স্বস্বরে !  
 বাজি'ছে মুরলী, মৃদঙ্গ, মন্দিরে,  
 বীণা বংশী, স্বর-তরঙ্গ-লহরী,  
 মধুর মধুর উছলে, আমরি !  
 আনন্দে বিভোর, সুধা পান করে,  
 হ'য়ে মাতোয়ারা গায় মধুস্বরে,  
 হ'য়ে মাতোয়ারা গায় প্রেমগীত,  
 কি শুনি রে !—শুনে হইলু মোহিত !

১

কল্পনে গো, এ কি স্বর্গেতে আনিলে ?  
 সম্মুখে ও কি গো বিরজা বিরাজে ?  
 স্তবর্ণ-সলিল-প্রবাহ সুন্দর,  
 স্তবর্ণের হংস চরে মাঝে মাঝে !

২

স্তবর্ণে গঠিত সহস্র সোপান,  
 স্তবর্ণের নৌকা, রতনের দাঁড় ;

দেববিদ্যাধরী লইয়া হৃদয়ে

ভেসে যায় তরী কাতারে কাতার ।

৩

সুবর্ণ সোপানে অসংখ্য নাগরী

করি'ছে সুন্দর সুখাবগাহন,

আহা ! কি নগর !—কি আনন্দ ধাম !

নরে! কি ভাবিতে পারে এ কেমন ?

৪

অন্যদিকে ও কি ?—বৈজয়ন্তপুরী ?

কোটি জলধনু কান্তি-শোভমান,

কোটি চন্দ্রদ্যুতি একত্র ভাতি'ছে,

হেরিয়া পুলকে শীহরে পরাগ ;

৫

পুরী দ্বারে দ্বারে পরীর প্রহরী,

দেব দেবাসনা একোষ্ঠে বিরাজে ;

অসংখ্য পতাকা উড়ে সৌধ-শিরে,

তোরণে দুন্দুভি জয়রাবে বাজে !

৬

ভিতরে বাজি'ছে আনন্দ-আরতি,

গাই'ছে অঙ্গুরে স্তুতি সুললিত,

দেবতাবেষ্টিত দেব পুরন্দর  
আনন্দে শুনি'ছে অপূর্ব সঙ্গীত !

৭

সুধার আবেসে ঢুলু ঢুলু আঁখি,  
হৃদয়-আনন্দ উছলে বাক্যেতে ;  
বিদ্যাধরীগণ যোগাই'ছে সুধা,  
সুধাপান করে যত অমরেতে !

৮

সম্মুখে অপূর্ব নন্দনউদ্যান ;  
মুহূর্তে মুহূর্তে নূতন নূতন  
ফুটে পারিজাত বিতরে সুগন্ধ,  
বিতরে অমিয়,—পিয়ে অলিগণ !

৯

নানাবর্ণ ফুল, নানাবর্ণ অলি,  
নানাজাতি মধু সুগন্ধ সচ্ছল ;  
অপূর্ব বিলাস অপূর্ব সুখেতে,  
স্বচ্ছন্দ অমরা, স্বচ্ছন্দ সকল ।

১০

এখা সন্ধ্যা গায়ত্রী বেদ সঙ্গীত সাহিত্য  
জ্ঞান সত্য ধর্ম মূর্তিমান্ সব,

মূর্তিমান প্রেম, মূর্তিমতী দয়া,  
মূর্তিমান সাম্য, বীরত্ব, গৌরব !

১১

মূর্তিমান বুদ্ধি, বিবেক, বৈরাগ্য,  
মূর্তিমান্ শুভ, ভাগ্য, গতি, মুক্তি,  
মূর্তিমান্ শৌর্য্য, একত্ব, বিশ্বাস,  
পুণ্য, পরকাল, কীর্তি, মায়া, ভক্তি !

১২

মূর্তিমতী পূজা, তপস্যা, সমাধি,  
যাগ, যজ্ঞ, হোম, বহি, বায়ু, জল ।  
মূর্তিমান মেঘ, অশনি, বিদ্যুৎ,  
নক্ষত্র, চন্দ্রমা, সূর্য্য, গ্রহ দল ।

১৩

হেন সভাস্থলে, বলিব কল্পনে,  
বলিব আমার দুঃখ সবিশেষ ;  
বলিব মর্ত্যের দুর্দশা-কাহিনী,  
বলিব নরক-নিবাসের ক্লেশ !

১৪

দেখাইব চিরি' দগ্ধ বক্ষঃস্থল,  
তবকে তবকে জলে কি দহন !



দেখাইব খুলি' মাথার উষ্ণীষ,  
শত্রু-পদাঘাত জাগি'ছে কেমন !

১৫

দেখাইব চরণে শৃঙ্খলের ক্ষত,  
দেখাইব মন্মো দাসত্বের ব্যথা !  
দেখাইব স্কন্ধে ভীম কর-ভার,  
বলিব প্রকাশি' দারিদ্র্য-বারতা !

১৬

বল, গো কল্পনে ! কেবা দেবরাজ ?  
বল কা'র কাছে গাই দুঃখগীত ?  
দুর্দশার স্রোতে ভাসে মর্ত্যলোক,  
শুনি' পুরন্দর হ'বে' কি দুঃখিত ?

১৭

কল্পনে গো ! তুমি পাপ, পুণ্য, জ্ঞান,  
আলো, অন্ধকার, আকাশ, জলধি,  
চন্দ্র, সূর্য, তারা, গ্রহ, স্বর্গ, পৃথ্বী,  
পাতাল, নরক, সুখ, দুঃখ আদি

১৮

সকলের, দেবি ! জীবন্ত আদর্শ,  
বালক, যুবক, প্রবীণ, প্রাচীন,

অন্ধ, খঞ্জাতুর, বধির প্রভৃতি  
সকলে সংসারে তোমার অধীন ।

১৯

তোমার সহায়ে ফুটিতেছে বাক্য,  
তোমার সহায়ে গাই দুঃখগীত ;  
তোমার সহায়ে পেরেছি জানিতে  
সংসারে আমরা বিধি-বিড়ম্বিত !

২০

তোমার সহায়ে আজি সুরলোকে  
দেবসভাস্থলে খুলিব হৃদয় ;  
দেখি—দেখি’ শুনি’ মর্ত্যের দুর্দশা  
দেবের করুণা হয় কি না হয় ?

২১

দেবরাজ ! এই ত্রয়স্ত্রিংশ কোটি  
দেবতাবেষ্টিত ত্রিদিব-সভায়  
আমি মর্ত্যবাসী শত্রু-উৎপীড়িত,  
দীন হীন ক্ষীণ জীবন্মৃত প্রায়

২২

দাঁড়ায়েছি, দেব ! করনাক ঘৃণা ;  
করি প্রণিপাত সবার চরণে ;

অমর-উচিত জানি না বন্দনা,  
অপরাধ কিছু ভাবিও না মনে ।

২৩

দেবরাজ ! বড় দুর্দশায় পড়ি'  
এসে'ছি ত্রিদিবে দেবতা-সদনে,  
এমন মনুষ্য নাই মর্ত্যলোকে  
আমার দুর্দশা বুঝে কিন্না শুনে ।

২৪

চন্দ্রসূর্য্যবংশ হ'য়েছে নির্বাণ,  
হ'য়েছে অবনী তিমিরে আবৃত !  
আঁধারে উড়ি'ছে খদ্যোতের পাঁতি,  
পেচকে গাই'ছে ককঁশ সঙ্গীত !

২৫

ভানুর মন্দিরে হনুর প্রভুত্ব,  
অন্যায়ের রাজ্য, ন্যায় পদানত,  
স্বার্থের সমুদ্রে ভাসে মর্ত্যলোক,  
সত্যের গৌরব হইয়াছে হত !

২৬

নাই ভীষ্ম, দ্রোণ, কৰ্ণ, ভীমার্জুন,  
রাবণ-দমন রাম ধনুর্ধর,

নাই ব্যাস, নাই বাল্মীকি ধীমান,  
নাই সে হস্তিনা, অযোধ্যানগর !

২৭

নাই ধনুর্বাণ, নাই তলওয়ার,  
নাই ভল্ল, নাই মল্লবীরপনা,  
নাই আশ্ফালন, নাই হুহুংকার,  
নাই ঘনঘোর দুন্দুভি-ঘোষণা !

২৮

দস্যুর পীড়ন হ'য়েছে মর্ত্যেতে  
আত্মরক্ষা করি হেন শক্তি নাই !  
পৃথিবী হ'য়েছে গভীর নিদ্রিত,  
আশ্রয় কে দেয় ? কোথায় দাঁড়াই ?

২৯

নাই পিতা মাতা, নাই বন্ধুজন,  
নিরাশ্রয় শিশু আছি গোটাকত !  
উদরান্ন বিনা ক্ষুধায় অস্থির,  
দস্যুর পীড়ন স'ব আর কত ?

৩০

দেহে রক্ত নাই, তবু রক্ত চাহে,  
না দিলে অস্থিতে করে বেত্রাঘাত !

তাহি তাহি ডাকি !—কে শুনে সে কথা !  
কোথার দাঁড়াই !—রক্ষা কর, নাথ !

৩১

কাঁদিলে দ্বিগুণ হ'য়ে ক্রোধান্বিত,  
বাঁধিয়া শৃঙ্খলে প্রহারে দ্বিগুণ ;  
রাখে কারাগারে বন্ধে দিয়া শিলা,  
শুনে না বিনতি কাতর বচন !

৩২

জঠর-অনল নিবা'বার তরে  
ভিক্ষা করি আনি—তারো অংশ চায় !  
'দিব না' বলিতে হয় না সাহস,  
কবলিত গ্রাস বলে কেড়ে লয় ।

৩৩

হইলু আশ্রিত—রক্ষা কর, নাথ !  
নহে মরুভূমি হ'ল মর্ত্যদেশ !  
হইল শ্মশান !—দহিল সকল !—  
যাহা যাহা ছিল হুল সব শেষ !

—

পরাদ্বীনের প্রণয় ।

ধীরে ধীরে যায়—ফিরে ফিরে চায়—

থমকি' থমকি' দাঁড়ায় ওই ।

প্রণয়বন্ধন কঠিন কেমন,

যাইতে চরণ উঠি'ছে কই ?

২

“যাইতে হ'বে না,—ফিরে এস, নাথ !

ছুখে স্নুখে দিন কাটিয়া যা'বে ।

উদরের দায়ে তোমা হেন ধনে.

বিদেশে দাসত্বে বেচিতে হ'বে !

৩

“স্মরিয়া এ কথা ফেটে

অহে নাথ ! ফিরে এস হে ঘরে ;

যেমন অবস্থা, তেমনি থাকিবে,

রাজত্ব পাইব তোমারে হেরে ।

\* ৪

“শত সত্রাটের ধন তুমি মোর !

তব অধরের মধুর হাসি,

ইন্দ্রের ইন্দ্রত্বে বিনিময় হ'ক,  
বলিলেও আমি ভাল না বাসি !

৫

“তোমার তুলনা আছে কি জগতে ?  
তুলনার ধন তুমি কি আমার ?  
আঁধারের আলো, নিজ্জীবে জীবন,  
সংসার বন্ধন, সংসারের সার !

৬

“আকাশের চাঁদ, নক্ষত্রের পাঁতি,  
নন্দন-সৌরভ, পুষ্পের মধু,  
মলয় বসন্ত, স্নগন্ধ সমীর,  
কিশলয় দাম ; বঁধু হে ! শুধু

৭

“এ সবার সঙ্গে তোমার তুলনা  
হইবে না ; চাঁদে কলঙ্ক আছে,  
নির্বাত-বন্ধুর-দন্ধ-শৈলময়  
চাঁদ কিসে লাগে তোমার কাছে ?

৮

“পরের প্রত্যাশী পরাধীন চাঁদ,  
পরের কিরণে ফুটিয়া থাকে ।

তুমিও বাঙ্গালি পরের প্রত্যাশী,  
পরাধীন জীব, পরের স্মৃথে

৯

“ফুটে থাক, দেখ পরের নয়নে !  
পরের কিরণে তোমার জ্যোতিঃ,  
এই সে কারণে তোমার সহিতে  
চাঁদের তুলনা করি হে যদি—

১০

“তাহা করিব না ; বংশ-ক্রমাগত  
এরূপ দশা ত ছিল না তোমার ।  
সে দিনো তোমার প্রখর রশ্মিতে  
উজলিতেছিল সমগ্র সংসার !

১১

“সে দিনো তোমার স্মৃকীৰ্ত্তি বাতাস  
যশের সৌরভ বহন ক’রে,  
অরণ্য স্মেরু সিন্ধু অতিক্রমি’  
আসমুদ্র ক্ষিতি, প্রত্যেক ঘরে,

১২

“বিতরিতেছিল ; সেই বাতাসেতে  
ফুটেছিল কত অরণ্য ফুল !



সেই বাতাসেতে সিন্ধু উদ্বেলিয়া  
কেঁপেছিল ক্ষিতি, স্রমের মূল !

১৩

“নক্ষত্রের পাঁতি দিবসে লুকায়,  
অরণ্য-উদ্ভিদ নন্দন হয় ;  
যে কুস্রমে কীট করে নিবসতি,  
তা’র মধু কভু পবিত্র নয় !

১৪

“মলয় সমীর সমান বহে না,  
বসন্তের শোভা রহে না চির,  
কিসলয় কালে শুখাইয়া থসে ;  
তুমি যে আমার অটল—স্থির !

১৫

“নিশ্চয় করিয়া তুমি যে আমার ;  
আমি তব দাসী সেবিয়া তোমা,  
কত জন্ম গেল, কত জন্ম যা’বে ;  
কত অপরাধ করেছে ক্ষমা !

১৬

“অমূল্য সম্পত্তি তোমার প্রণয়,  
জীবনে জীবিত, মরণে সাঁথি ।

অপার্থিব ধন তোমার আদর,  
তোমারি চরণে আমার গতি ।

১৭

“সংসার অরণ্য ভয়াল দুর্গম !  
তাহে জন্ম-অন্ধ অবলা জাতি,  
দুর্গমের পথে সম দুঃখী হ’য়ে  
একমাত্র, নাথ ! তুমিই সাঁথি !

১৮

“কিসে সুখে র’ব, কিসে সুখী হ’ব,  
এই মাত্র চিন্তা হৃদয়ে ল’য়ে  
ফির দিবানিশি, আমি অভাগিনী  
তোমার এ দুঃখ দেখি হে চেয়ে !

১৯

“দরিদ্র বস্ত্রেতে দাসত্ব ব্যবসা,  
বাণিজ্য শিল্পের গৌরব গেছে,  
গেছে অর্থ-নীতি, বিজ্ঞান-কৌশল,  
জীবনি-সামর্থ্য বাকি কি আছে ?

২০

“বেড়েছে সভ্যতা, উপাধির ঘটা !  
রাজা, রায়, রাঁয়া, রায় বাহাদুর,

গ্রাণ্ড কমাণ্ডার, স্ট্যার, বা রাংলার,  
এমে, বিএ আদি হ'য়েছে প্রচুর !

২১

“ডে খুটী, মুন্সেফ, উকীল, কোন্সেলি,  
নেটিব সিভিল কেরাণী যত,  
মাস্টার, ডাক্তার, চাপ্রাসি, পদাতি,  
বারু বাহাদুর !—গৌরব কত !

২২

“নামে বড় ঘটা, কার্যেতে কাঙ্গালি,  
সভ্যতা ব্যতীত দেখি না আর ।  
বাক্যে বাহাদুর, বক্তৃতা বাগীশ,  
অন্দরে বীরত্ব !—তিষ্ঠান ভার !

২৩

“দাসত্বে বিকা'বে অমূল্য জীবন,  
বাঙ্গালি-ললাটে বিধাতা বুঝি  
বসি' অন্ধকারে এই কালবাক্য  
লিখিল চখের পলক বুঁজি ?

২৪

“ফিরে এস, নাথ ! যাইতে হ'বে না ;  
কোথায় যাইবে দাসীরে ছেড়ে ?

যত দুঃখ স'য়ে, উপবাসী র'য়ে,  
দিনান্তে দেখিব নয়ন ভরে !

২৫

“চাহিনা সম্মান, সম্পদ, সৌভাগ্য,  
অর্থ, অট্টালিকা, বিলাস রাশি,  
ভোগ, তৃষ্ণা, শান্তি, রত্ন, অলঙ্কার,  
সৌন্দর্য, স্তম্ভক্যাকারিণী দাসী ।

২৬

“দরিদ্রতা স'ব, বৃক্ষতলে র'ব,  
নগরে মাগিয়া খাইব, তবু  
অমূল অতুল তোমা হেন নিধি  
পরের করেছে দিব না কভু ।

২৭

“প্রাণের ভিতরে অতি যত্ন করে,  
'লুকা'য়ে রাখিব অমূল্য নিধি,  
অপরের হাতে, কভু কোন মতে,  
দিব না, দৈবাৎ দেই হে যদি,—

২৮

“—শূন্য প্রাণ ধ'রে, যাহারে তাহারে  
দিব না ; যে জন রতন চিনে,

হৃদয়ের ধন রাখিতে যে জন  
আমার মতন যতন যানে,

২৯

“তাহারেই দিব, কিন্তু ফিরে নিব  
তখনি আবার ; দিনেক তরে,  
রাখিতে নারিব, যখন লইব  
কষিত কাঞ্চে কষিব ফিরে ।

৩০

“ওজন করিব, পরীক্ষি’ দেখিব,  
হৃদয়ে লুকা’য়ে রাখিব নিধি ;  
দরিদ্রের ধন, অমূল্য রতন,  
কত পুণ্য ফলে পেয়েছি যদি,

৩১

“অতি নিরঞ্জে অতি সন্মোপনে  
হেরিব একাকী সতর্ক ভাবে,  
শব্দমাত্র পেলে লুকা’ব অঞ্চলে,  
পাছে কে কোথায় দেখিতে পা’বে ।

৩২

“তোমা নিধি তরে যা’ আছে সংসারে,  
অকাতরে তাহা অজিতে পারি,

বিলাস বৈভব, সম্পদ, গৌরব,  
এর কাছে তুচ্ছ গণনা করি ।

৩৩

“যেখানেই থাকি, যদি চক্ষে দেখি,  
যদি একত্রেতে থাকিতে পারি,  
দারিদ্র্য-যন্ত্রণা, দাসীত্ব-বেদনা,  
রোগ, শোক, ক্লেশ মনে কি করি ?

৩৪

“অন্ধ কারাগারে, দুর্গম কান্তারে,  
দেশান্তে দীপান্তে যেখানে রই ।  
বে কোন যন্ত্রণা, যে কোন বেদনা,  
নিগ্রহ, নিরাশা, যতই সহি,

৩৫

“নিদাঘ-তপনে, তৃষিত পরাণে  
মরুভূমে যদি পড়িয়া থাকি,  
কিসের নিরাশা, কিসের পিপাসা  
তোমায় যদ্যপি নয়নে দেখি ?

৩৬

“আশ্রয় বিহনে, বিনা আবরণে  
হিমান্তে অসহ্য হিমানী স’য়ে,

বরিষার বারি মস্তকেতে ধরি,  
হৃদয়ের নিধি হৃদয়ে লয়ে,

৩৭

“চির দিবানিশি অকুলেতে ভাসি’  
হৃদয়েতে যত হইব সুখী,  
প্রাসাদ বাসিনী, সৌভাগ্য শালিনী,  
মম সম সুখী হইবে সে কি ?

৩৮

“মৃত্যুশয্যা’পরে, যন্ত্রণা পাথারে  
সহস্র ভুজঙ্গ দংশিবে যবে,  
তখনো এ ধনে হেরিলে নয়নে,  
অমৃত-প্রবাহ হৃদয়ে ব’বে ।

৩৯

“জীবিত-ঈশ্বর ! প্রাণ-সহচর !  
কোথা যা’বে তব দাসীরে ফেলে ?  
করি যোড় হাত, ফিরে এস, নাথ !  
অধীনীরে একা ফেলিয়ে গেলে !—

৪০

“অবলার প্রাণ কুসুম সমান,  
বজ্র-সম তব বিরহানল

সহিতে নারিবে, দহিবে দহিবে  
দেহ, মনোবৃত্তি, জীবন-বল !

৪১

“তোমার বিহনে মরিব পরাণে,  
মরিব নিশ্চয়, দেখিও পরে।  
এক তিল ছাড়ি’ থাকিতে না পারি,  
এ দীর্ঘ বিচ্ছেদ স’ব কি ক’রে ?

৪২

“তোমার কারণে সংসার-ভবনে  
খেলাধূলা ল’য়ে র’য়েছি বসি’ ;  
তোমার লাগিয়া, সকল ত্যজিয়া  
জ্বলন্ত অনল মাঝারে পশি’

৪৩

“খুঁজিতেছি সুখা-শান্তি-নিকেতন,  
মরুভূমে খুঁজি কমল দল ;  
তোমারি কারণে নিরেট পাষাণে  
খুঁজি’ছি সুখদ শীতল জল !

৪৪

“তোমারি কারণে সাগর জীবনে  
পশে’ছি রতন লাভের তরে ;



তোমারি কারণে অসাধ্য সাধনে  
হ'য়েছি নিযুক্ত পৃথিবী'পরে ।

৪৫

“তোমারি কারণে হৃদয়-গগনে  
একমাত্র আশা নক্ষত্র ভাতে ;  
তোমারি কারণে সংসার কাননে  
বৈঁধেছি কুটীর,—থাকিব তা'তে ।

৪৬

“তোমারি কারণে হৃদয়ে গোপনে  
পু'ষেছি বশ্চিক আদর ক'রে ;  
তোমারি কারণে পাগল পরাণে  
হাসি কাঁদি, গাই হৃদয় ভরে ।

৪৭

“তুমি অভাগীর মনের উৎসাহ,  
তুমি একমাত্র প্রাণের প্রাণ ;  
তুমি সর্বসার, জীবন-আধার,  
তোমাভিন্ন দাসী জানে না আন ।

৪৮

“তুমি আশা, তুমি ভরসা আমার,  
তুমিই উৎসাহ, হৃদয়, বল ;

তুমি নিরাশ্রয়ে আশ্রয়-পাদপ,  
তুমি পিপাসার শীতল জল !

৪৯

“তুমি অন্ধকারে উজ্জ্বল আলোক,  
সংসার সাগরে তরণী মম ;  
তুমি ধর্মঅর্থকামমোক্ষ ভবে,  
কে আছে আমার তোমার সম ?

৫০

“ভবে তুমি মোর উপাস্ত্র দেবতা,  
তন্ত্র মন্ত্র ধ্যান সাধনা আদি ;  
যোগ, উপাসনা, তপস্শ্রা, সমাধি,  
তব পাদপদ্মে সকলি বিধি ।

৫১

“তুমি সত্য-ধর্ম-জ্ঞান-মুক্তি-গতি,  
তব ব্রহ্মবাক্যে অটল জ্ঞান ;  
তব আশ্রা মম নিয়তি লিখন  
তুমি ইচ্ছাপূর্ত্ত, ধারণা, ধ্যান ।

৫২

“জাগ্রতে নিদ্রিতে শয়নে স্বপনে  
তব চিন্তা বিনা জানি না আর,

যে দিকে যা' দেখি, যে দিকে যা' শুনি,  
সকল পদার্থে তুমিই সার।

৫৩

“এস, নাথ ! যেতে হ'বে না দাসত্বে,  
চল ত্যজি' গৃহ অরণ্যে যাই।  
এ ছার সংসার, ছার পরিবার  
আমার বলিতে কিছুই নাই।

৫৪

“মনুষ্য-সংসারে কি হ'বে থাকিয়া ?  
শোক, তাপ জরা দারিদ্র্যানলে  
দিবানিশি যথা হাহাকার শব্দ,  
দিবা নিশি যথা জীবন জ্বলে,

৫৫

“যথা স্বার্থসিদ্ধি একমাত্র কার্য,  
যথা সত্য, ধর্ম, বিবেক নাই,  
যথা বিষয়ীর ঘোর আর্তনাদ—  
নিষ্ঠুরাভিনয় দেখিতে পাই,

৫৬

“যথায় কালের ঘোর আশ্ফালনে,  
যথায় পাপির চীৎকার রবে

মুহুমুহু ভয়, ঘৃণায় অস্থির,

ছি ! ছি ! ছি ! তথায় কি রূপে র'বে ?

৫৭

“মিথ্যা রঙ্গলীলা, মিথ্যা খেলাধুলা

মিথ্যাময় সব বিচিত্রতা ময় !

ছি, ছি ! এ সংসারে —এ হেন নরকে

মুহূর্ত্তেক আর থাকিতে কি হয় ?

৫৮

“সকলেই এক—ঈশ্বরের জীব ;

কিন্তু পরস্পরে সাম্যমাত্র নাই !

একজনে এথা অযুতের প্রভু !

কেহ হাসে—কেহ কাঁদি'ছে সদাই !

৫৯

“কোটি কোটি প্রাণী একের সেবায়,

একের আজ্ঞায় সৃষ্টি রসাতল !

একের শাসনে কম্পিত জীবনে

কোটি কোটি প্রাণী ঘুরিছে কেবল !

৬০

“একজন যেন মন্ত্রমুগ্ধ করি’

রেখেছে সংসার ! ( এ কি বিড়ম্বনা ! )

একের অসিতে সংসার নাশিতে  
 কি জন্ম আদিষ্ট হ'ল এক জনা ?

৬১

“একের সাক্ষাতে অবনত মাথে  
 র'য়েছে সংসার ! একি বিচিত্রতা !  
 একের কারণে অযুত পরাণে  
 হুংপিণ্ড ছিঁড়ি' দেয় কেন এথা ?

৬২

“একের জন্মেতে অযুত জনেতে  
 কেন করে হৃদে রুধির সঞ্চয় ?  
 একের সেবায় কেন রক্ত দেয়  
 বক্ষঃস্থল চিরি জীব সমুদয় ?

৬৩

“একে এথা করে অপারে পীড়ন,  
 একের আদেশ অদৃষ্টির মত  
 মানে সবে এথা—এ হেন সংসারে  
 আছে কি থাকিতে কিঞ্চিৎ মুহূর্ত ?

৬৪

“ছি, ছি, নৃশংসতা ! স্বার্থের লাগিয়া  
 ঘৃণিত দৈহিক, সন্তোগের তরে

নররক্ত পাত ? রুধিরের নদী  
ব'য়ে যায়, ক্ষণে সম্মুখ সমরে !

৬৫

“স্বার্থের কারণে এত নিষ্ঠুরতা ?  
মনুষ্য হইয়া দৈত্যের ব্যভার ?  
স্বার্থের কারণে মিত্রদ্রোহী নর  
যে সংসারে ; এই সেই ত সংসার !

৬৬

“পিতাপুত্রে এথা স্বার্থের বিচার !  
জননীর স্নেহে-স্বার্থের গরল !  
দাম্পত্য প্রণয়ে স্বার্থের ভুজঙ্গ !  
স্বার্থসিদ্ধিমাাত্র উদ্দেশ্য কেবল !

৬৭

“শঠের সাম্রাজ্য, বৃশংসের খনি,  
কাপট্য নিবাস স্বার্থের রাজত্ব,  
এই সে সংসার ? এ যে ছায়াবাজী !  
মিথ্যা নাট্যভ্রম—অসার—অনিত্য !

কে তুমি ? \*

১

কে তুমি ? তোমারে আঁখি হেরে বার বার।  
 মনে এই হয় মোর, 'জীবনের সহচর'  
 যাবে জীবনের সনে ত্যজিয়া সংসার।  
 তাই কি ভুলিতে নারি মূরতি তোমার ?

২

শয্যায় যখন থাকি, মুদিত-নয়ন,  
 স্বপনের সহযোগে গভীর নিদ্রার ভোগে  
 তখনো হৃদয়ে তোমা করি দরশন,  
 তাই মনোহর মূর্তি মোহিল নয়ন ?

৩

যখন যে দিকে করি নয়ন সঞ্চার,  
 ভূতলে ত্রিদিবে কিবা, বিরাজিত রাত্রিদিবা,  
 মানস মোহন ওই মূরতি তোমার  
 স্মৃতির হিল্লোলে যুঁহু ছুঁলে অনিবার।

৪

কখনো আকাশে তোমা করি দরশন।  
 সুনীল অনুরোপরি দামিনী মিশাল, মরি,

---

\* এটি শৈশবের রচিত।

কৌতুক করহ সদা বলসি' নয়ন ।  
নিশাকরে পশি' কভু যুড়াও জীবন ।

৫

কভু রৌদ্রময় তুমি মার্ভণ্ড মণ্ডলে  
প্রকাশি' প্রথর কর মানস পরীক্ষা কর,  
বুঝি বা প্রণয় কোপ প্রদর্শন ছলে ।  
নতুবা অঁাখির তৃপ্তি হইবে কি বলে ?

৬

আবার নেহারে অঁাখি শোভার সদন,  
নব জলধর সম আ'মরি কি অনুপম ?  
কিন্তু কা'র তরে তুমি করি'ছ রোদিন ?  
বৃষ্টি ছলে তাই অশ্রু হয় বরিষণ ।

দিবা নিশি যে মুছি'ছে নয়ন সলিলে,  
তুমি কি তাহার তরে, বল, শুনি সত্য ক'রে,  
আশার আকারে ধারা ফেল কভু ভুলে ?  
অথবা এ আশা মাত্র কৈবল্য জন্মিলে ?

৮

যা'র তরে অঁাখি-নীর বার বার ঝরে,  
তা'র যদি সেই মত ক্ষরে অশ্রু অবিরত,



সেও যদি ঝাঁপ দেয় প্রেম-সরোবরে,  
তবে যাতনার শেল ফুটে কি অন্তরে ?

৯

কিন্তু আমি চিরমুগ্ধা না জানি কারণ,  
জানে কি বিহঙ্গী-প্রাণ নিষাদ-নিশিত বাণ,  
পরাভবি' বায়ুবেগে আসিয়া কখন  
পশিয়া হৃদয়ে, হায়, নাশিবে জীবন ?

১০

কিন্মা বন-পাদপের উন্নত শাখায়  
রাখিয়া শাবক পাখী পালে' তা'র কাছে থাকি,  
জানে কি সে ভুজঙ্গিনী দংশন আশায়  
করিয়াছে সে তরুর কোটর আশ্রয় ?

১১

এই যে হৃদয়-গ্রন্থি স্ফূট বন্ধন ;  
শাগিত ছুরাশা-অসি অস্থির ভিতরে পশি  
চকিতে শতধা করি' করিবে ছেদন !  
সুখ-দীপ নিবাইবে কালের পবন !

১২

জান কি, প্রাণেশ ! তুমি পার কি বলিতে ?  
তোমায় নিরখি কেন চাহে এ চঞ্চল মন !

সংসারের সুখাশায় জলাঞ্জলি দিতে ?

যন্ত্রণা-অনল কেন জ্বলিতেছে চিতে ?

১৩

কে জানে যে, জ্বলে কেন ? কে আর বলিবে  
বিষের যাতনা কত ? কিসে সে বুঝিবে তত,

আশাবিষ বিষদন্তে যা'রে না দংশিবে ?

জ্বলে কেন ?—অভাগীই সে কথা বলিবে ।

১৪

সেই দিন,—যবে, আহা, আছে কি স্মরণ ?  
উষার অঞ্চলে ঢাকা, স্মৃতির দুয়ারে আঁকা

যেই মূর্তি হেরেছিল এ দীন নয়ন,

সেই দিন ছিঁড়িয়াছে সংসার বন্ধন ।

১৫

সেই দিন জ্বলিয়াছে হৃদয়-নিলয় ;

সে অবধি অনুক্ষণ শোকরূপ সমীরণ

উত্তেজি' বিচ্ছেদানল প্রবাহিত হয় ।

ঢালি অশ্রু বারি রাশি,—তবু ক্ষান্ত নয় ।

১৬

সেই উষাকালে সেই শরত সময়

সেই শশী স্নান কায় দরশন করি' হায়,

কাঁদিলাম যেই দিন স্মরিয়া তোমায় ;  
সেই হ'তে গেছে সুখ ত্যজিয়া আমায় ।

১৭

তবে যেই দ্বার রুদ্ধ দুঃখের কাঁটায়,  
কে করিল পরিষ্কার      এ সেই হৃদয়-দ্বার,  
কে তবে পশিল ? নাহি জানি, পুনরায়  
সুখ-আশে নিরাশার বিলাস শালায় ।

১৮

কে তুমি ? তুমি কি সেই হৃদয়ের ধন,  
পরিণয় সূত্রে গাঁথি      প্রেমের কুসুম পাঁতি |  
দিয়াছিলে গলে মোর যুড়া'তে জীবন ?  
হায়, সে সুখের দিন কোথায় এখন ?

১৯

সে দিনের সে উৎসব স্মৃতির মন্দিরে  
আগে প্রদানিত সুখ,      এখন বাড়া'য় দুখ,  
ভারপ্রাপ্তি এই অসার শরীরে,  
যত দিন প্রাণ বায়ু বহিবেক ধীরে ;

২০

এই জীবনের স্রোত সংসার প্রান্তরে  
হইবেক প্রবাহিত,      যত দিন এই মত

মিলিবে না যত দিন অনন্ত সাগরে,  
ততদিন এই স্মৃতি জাগিবে অন্তরে ।

২১

দুঃখভারশীর্ণ বপুঃ কালের কবলে  
যেই দিন সমর্পিব,            সেই দিন প্রক্ষালিব  
হৃদয়ের মলিনতা স্মৃতিসিন্ধু জলে ;  
হইবেক স্মৃতি দন্ধ চিতার অনলে ।

মহাপ্রলাপ ।

১

অগাধ গন্তীর স্থির জ্ঞানময়,  
হে বিশ্ব ব্রহ্মাণ্ড আধার-ঈশ্বর !  
হে নিত্য অনন্ত চিন্তাতীত বিভো !  
হে সত্য স্বরূপ প্রভো পরাৎপর !

২

অভাব স্বভাব সকলি তুমি হে,  
তোমাতেই তুমি-তুমি জান তোমা ।  
তোমার অনন্ত ক্রীড়া জলধিতে  
জীব জলবিশ্ব, কি বুঝিবে সীমা ?

৩

তোমার অদ্ভুত অনন্ত তরঙ্গে  
 এ বিশ্ব ব্রহ্মাণ্ড ফেন-সমন্বিত !  
 নীল নভঃপটে বিদ্যুৎ চমকে ;  
 জীব বলে ‘আমি জাগি, ওহে বিভো !’

৪

পলকে পলকে উৎপত্তি, বিনাশ,  
 তুমি সে উৎপত্তি, বিনাশ আপনি ।  
 তুমি ধর্ম্মাধর্ম্ম, কুকর্ম্ম শুকর্ম্ম,  
 তুমি হে অচিন্ত্য হৃদিচিন্তামণি ।

৫

ভ্রান্ত ভব-জীব চিন্তে কি পারিবে ?  
 তুমিই তোমাতে চিন, হে চিন্ময় !  
 তোমার কর্তব্য তুমি ক’রে থাক,  
 জীব বলে ‘আমি করি সমুদয় !’

৬

জলে থাকে মীন—জলকে চিনে না,  
 তৃষ্ণায় সতত আকুল পরাণী !  
 তুমি সে সলিল—তুমিই সে মীন—  
 তুমি সে পিপাসা-পীড়িত আপনি ।

৭

তুমি হে অদ্বৈত, সর্ব-বিশ্বময়,  
নরকে স্বরগে সর্বত্র সমান ।  
ভ্রান্তভেদবুদ্ধি ক্ষুদ্রজ্ঞান জীব  
তোমাতে স্বতন্ত্র করে অনুমান !

৮

তোমার অস্তিত্বে সন্দিগ্ধ মানব,  
তোমায় অর্চিতে দেয় ফুল জল,  
বন্ধপরিকরে ডাকে হে তোমাতে ;—  
“কোথা দয়াময় কর হে মঙ্গল !”

৯

ভক্তিমুগ্ধচিত্তে দেয় পুষ্পমালা,  
পুষ্প কি স্বতন্ত্র, ওহে বিশ্বময় ?  
যে তোমাতে পূজে সে কি তোমা ভিন্ন ?  
কে পূজে কাহারে—এই ত বিশ্বময় !

১০

আস্তিক, নাস্তিক, ভণ্ড-গণ্ড, গৌড়া,  
কি বলে সে কথা বুঝিতে পারি না ।  
‘তোমা হ’তে তুমি স্বতন্ত্র’ এ কথা  
কখনো আমার প্রাণেতে সই না !

১১

এ জৈব জগত; মায়ামরীচিকা—  
 মিথ্যা ভ্রান্তিপূর্ণ অসিদ্ধ অসার !  
 জ্ঞানের গভীর স্মৃতিস্কল দৃষ্টিতে  
 দেখ, জীব ! যাবে ভ্রান্তি অন্ধকার !

১২

প্রকৃতি প্রকৃত প্রবাহের প্রায়,  
 সর্বদা বিয়োগ ব্যবধান মাঝে  
 জন্মি'ছে, জরি'ছে, মরি'ছে, তথাপি  
 এ বিশ্ব-রহস্য কেহ নাহি বুঝে !

১৩

এ জৈব জগতে কেবল যন্ত্রণা,  
 কেবল দুর্দশা, দুরাশা দুষ্কর !  
 জরা, ব্যাধি, শোক, সন্তাপে সতত  
 ত্রাহি ত্রাহি জীব ডাকে নিরন্তর !

১৪

এত দেখে—তবু শিখে না মানব ।  
 কেমন বিচিত্র কুহক মায়ার !  
 সংসারের ঘোর কষাঘাতে সদা  
 অস্থির, তথাপি যা' করে সংসার !

১৫

সংসার অকূল দুঃখের সমুদ্রে,  
কিরূপে তরিব, এই বড় ভয় !  
আশার পসরা লইয়া মস্তকে,  
ডুবিলাম বুঝি দেখ, বিশ্বময় !

১৬

জুয়ারের জল যায় ব'য়ে যায় !  
অবিরাম গতি, দাবায় না কাল ।  
দিন অনুদিন তনুমন ক্ষীণ,  
জীবনজড়িত জড়তা-জঞ্জাল !

১৭

কি জন্য আসিয়া, কি ক'রে যেতেছি ?  
বুঝিতে সময় দিল না আমায় !  
জলের বুদ্বুদ জলে মিলাই'ছে !  
ধিক রে জীবন ! যৌবন তোমায় !

১৮

এ শুভ্র স্ফটিক বিমল যৌবন,  
এ রূপের কান্তি স্তব্ধ-স্বপ্নমা,  
এ যশঃ-সৌভাগ্য, কীর্তি, ধন, জন,  
জ্ঞান, গর্ব সব বিদ্যুত উপমা !



১৯

হে গর্বিত, অন্ধ, ভ্রান্ত, মহামত্ত,  
 অশুরাবতার বলিষ্ঠ সত্ৰাট !  
 ফুলাইয়া বক্ষঃ দন্তে চলিতেছ ;  
 ধীরে চল ; চক্ষে দেখে যেও বাট !

২০

জীবের সুদিন জলের লিখন,  
 দেখিতে দেখিতে মিলাইয়া যায় !  
 আজিকে তোমার রাজত্ব অবনী,  
 কাল পরিণত সমাধি শয়্যায় !

২১

আজিকে প্রকৃতি শান্ত আছে, তাই  
 চলিতেছ দন্তে ফুলাইয়া ছাতি !  
 কাল কার্যক্রমে এই সে প্রকৃতি  
 'ওই বক্ষঃস্থলে মারি' বজ্র-লাথি

২২

ভূমেতে পাড়িবে তব রাজবপুঃ !  
 রাজছত্রদণ্ড, রাজসিংহাসন  
 বজ্রমুষ্ঠাঘাতে চূর্ণ হ'য়ে যা'বে !  
 রহিবে কেবল স্বপ্নের স্মরণ !

২৩

সর্বোচ্চ আসনে বসি' মান্যবর,  
জগতে বুঝাও ;—নিজে বুঝিয়াছ ?  
জ্ঞান-অভিমান-গর্বিত হৃদয়ে  
বিজ্ঞ বলাই'ছ ;—আপনা চিনেছ ?

২৪

পদে পদে ভাব স্বার্থ আপনার,  
মুখে বল 'করি পরের মঙ্গল !'  
সাম্য, রাজনীতি, সমাজ লইয়া  
বল কত কথা ;—বুঝ সে সকল ?

২৫

দূর হ রে মূর্খ !—প্রবঞ্চক !—ভণ্ড !  
বড় বড় বাক্যে প্রতার মানবে !  
সত্যের পবিত্র নাম ল'য়ে মুখে,  
অসত্য আচর !—এ'র ফল পা'বে !

২৬

কিছু স্থির নয়, ওরে ভ্রান্ত মন !  
আমার আমার কর পরিহার ।  
ছাড় দত্ত কর নিস্বার্থ তপস্যা,  
ভুল অহংকার অসার পসার !

২৭

লৌকিক যশেতে অন্ধ হইও না ;  
তাহাতে কেবল দুরাশা বাড়িবে ।  
কামনা-বিজয়ী হ'তে পার যদি,  
মুক্তি যে কি বস্তু বুঝিতে পারিবে ।

২৮

প্রপঞ্চ-আত্মক-দেহ-পিণ্ড মাত্র  
দুঃখের কারণ জানিহ নিশ্চয় ;  
প্রকৃতি পুরুষে স্বতন্ত্র রাখিতে  
পারিলে, পরম পুরুষার্থ হয় ।

২৯

অজ্ঞানে আশার করে উপাসনা !  
আশা সে দুঃখের নিদান নিশ্চয় ।  
নিকাম অপস্যা শুনিতে কঠোর ;  
পরিণাম কিন্তু আশ্চর্য সুন্দর !

৩০

অহো বিশ্বময় ! অভাব-আধার !  
রক্ষাকর, নাথ ! বড় দুঃখী আমি ।  
ঘোর কষাঘাতে জর্জরিত তনু !  
শান্তির নিদান এক মাত্র তুমি ।

৩১

মনের আবেগে বলি কত কথা ;

তুমি সে বলাও আমার কি দোষ ?

যা' কর্তব্য হয়, তাই কর, প্রভো !

অথ দুঃখে মোর সমান সন্তোষ !

দার্শনিক সংসার ।

গগন, তপন, পবন, পাখার,

পৃথিবী প্রভৃতি প্রপঞ্চ ধাতার,

নক্ষত্র, চন্দ্রমা, গ্রহ, ছায়াপথ,

দিবা, রাত্রি আদি কাল ক্রমাগত,

প্রাতঃ, সন্ধ্যা, উষা, নিদাঘ, বরিষা,

নিয়তি বহ্নিতে নিত্য যাওয়া আসা ।

এ সব অনাদি, নিত্য নিরবধি

রহিয়াছে—র'বে । ভবের এ বিধি

কবে সৃষ্ট হ'ল ? কবে ধ্বংস হ'বে ?

কবে ছিল নাক ? কবে না রহিবে ?

কে পারে বলিতে ? ভাবিতে হৃদয়

বিস্ময়ে স্তম্ভিত ! অন্ধকারময়

হেরি দশদিশি,—নভঃ, রবি, শশী,  
 অনিল, সলিল, কাল, দিবা, নিশি  
 ছিলনা যখন, কি ছিল তখন ?  
 কি ছিল কোথায় ভাব দেখি মন !  
 ভাবিতে পারি না, বড় অন্ধকার !  
 আশা ভরসাদি অকূল পাথার !  
 মন, প্রাণ, ধ্যান, ধারণা সকল,  
 যত কিছু সব ধূ ধূ ধূ কেবল !  
 যত কিছু তার কোন কিছু নাই ;—  
 অন্ধকার !—না না, কোথায় বা তা'ই ?  
 কোথায় বা তুমি ? কোথায় বা আমি ?  
 কোথায় অন্তর ? কোথা অন্তর্যামী  
 বিধাতা কোথায় ? উহঃ, কি যন্ত্রণা !  
 দারুণ অসহ্য ভাবিতে পারি না !  
 রে উন্মত্ত মন ! কাজ নাই ভাবি'  
 কাজ নাই ঘোর অকূলেতে ডুবি';  
 নিজে অতি ক্ষুদ্র পরমাণু প্রায়  
 পরমাণুপুঞ্জসমষ্টি, ধরায়  
 যন্ত্রের পুতুল যন্ত্রে ঘুরি, ফিরি,  
 যন্ত্রে শব্দ হয়, যন্ত্রে গান করি !

যন্ত্রে হাসি কাঁদি, যন্ত্রে অভিনয়  
 জীব রঙ্গভূমে, নাট্য ভ্রমময়—  
 সংসার ! ক'দিন র'বে এ মোহিনী ?  
 (পলকের কার্য্য) পোহাবে রজনী,  
 সর্বশেষ অঙ্ক সমাপ্ত হইবে,  
 যন্ত্র-যবনিকা পড়িয়া রহিবে !  
 অহং আত্মারাম জাগি যত দিন  
 পরগায়ু সংখ্যা ঠিক তত দিন ।  
 তত দিন আর কত দিন হ'বে ?  
 সংখ্যা শতবর্ষ চৈতন্য রহিবে !  
 এই শতবর্ষ অনন্তের সহ  
 উপমা করিলে,—আমি নাই কেহ  
 এত ক্ষুদ্র ; কিম্বা অস্তিত্ব বিহীন !  
 অস্তিত্ব অনন্তে হ'য়ে গেছে লীন !  
 জীবের চেতনা নিদ্রার স্বপন !  
 তথাপি সংসারে,—আমি এক জন ?  
 ক্ষুদ্রাদপি ক্ষুদ্র অপূর্ণ অর্দ্ধাঙ্গ  
 উন্মত্ত জীবের দেখ দেখি রঙ্গ !  
 অজেয় জিনিতে যায় কুতূহলে,  
 অকথ্য প্রলাপ যাহা নয় বলে ।

অনন্ত হইতে অনন্ত যে জন,  
 নিত্যাপেক্ষা নিত্য, নিত্য নিরঞ্জন,  
 ভবিষ্যের অগ্র অতীত-অতীত,  
 পূর্ণ পরাংপর স্বয়ং সচ্চিত,—  
 স্বতন্ত্র ভাবিতে হ'য়েছ ব্যাকুল ?  
 কখন সন্দেহ কভু বল ভুল,  
 কভু বল আছে, কভু বল নাই ;  
 রঙ্গ দেখে অঙ্গ জ্বলি'ছে সদাই !  
 কতটুকু চিন্তা ? কতটুকু জ্ঞান ?  
 কতটুকু বুদ্ধি ? কতটুকু প্রাণ  
 মনুষ্যের ? তাই ভাবিবে ঈশ্বরে ?  
 স্বথায় বক্তৃতা কুতর্ক বিস্তারে  
 কেন পণ্ডিত্রম ? যশের লালসা  
 হ'য়ে থাকে যদি, মিটিবে সে আশা !  
 কিন্তু কার্য কিছু হ'বে না হ'বে না !  
 কভু হয় নাই, কভু হইবে না ।  
 কোটিকল্প যুগ প্রজ্ঞা, প্রীতি, ভক্তি,  
 বিশ্বাস, সাধনা সাধি' লভি, মুক্তি',  
 অনন্ত ভজিতে শিখ, তা'র পর  
 ব্রহ্ম—উপাসনা !—ব্রহ্ম পরাংপর

তর্কেতে মিলে না, তাদৃশ উর্দ্ধেতে  
 জ্ঞান কি বিশ্বাস পারে না পৌঁছিতে !  
 প্রেমিক প্রেমেতে কান্দিয়া পাগল !  
 ভাবুক ভাবেতে অগাধ বিহ্বল !  
 সেই মাত্র সুখ, সেই মোক্ষ ভবে,  
 সেই সত্য, তা'ও প্রলাপে সম্ভবে !  
 সংসার প্রলাপে বিহ্বল সতত,  
 স্বার্থ কণ্ডুয়নে অস্থির উন্মত্ত !  
 যশের লালসা অতি তীব্রতর  
 বৈষম্য বিরোধ অতি ভয়ঙ্কর !  
 “আমি বিজ্ঞ, প্রাজ্ঞ, প্রতিভা-সম্পন্ন !  
 “কবি, দার্শনিক, জ্ঞানি-অগ্রগণ্য !  
 “আমি ধনী, মানী, যশস্বী সংসারে !  
 “আমি এক জন ! আমি কি কাহারে  
 “গণি ? সংসারেতে কে আমার মত ?  
 “আমি রাজা—পৃথ্বী মম পদানত !  
 “আমি প্রভু ; তুমি সেবক আমার !  
 “আমি শ্রেষ্ঠ, তুমি নিকৃষ্ট, ধাতার  
 “লিখন এ সব, অদৃষ্টের মত  
 “পাল মম আজ্ঞা, দেখেছ শানিত



“তরবারি ? জান মম বাহুবল ?

“আমি বলীয়ান ;—তোমরা কেবল

“সেবক আমার ! আমারি কারণে

“জন্মেছ ভূতলে, আমি যদি প্রাণে

“বধি তোমাদিগে—মরিবে নিশ্চয় !

“আমি যদি রাগি, তবে কা’রে ভয় ?

“আমার তৃপ্তিতে তোমাদের তৃপ্তি,

“আমার গতিতে তোমাদের গতি !

“আমি যাহা ক’ব—পাষাণের রেখা,

“আমার যে আজ্ঞা—বিধাতার লেখা

এরূপ বৈষম্য, অহো ! নিরূপায়,

এ অন্তঃপ্রবাহ দেখাব কাহায় ?

জন্মমাত্র সবে সমান সংসারে

সকলেই দায়ী সকলের তরে ।

সকলের ভোগ্য স্বাধীনতা-নিধি,

দাসত্ব, প্রভুত্ব, কাল্পনিক বিধি !

থাকুক সভ্যতা, সুশিক্ষা, সমাজ,

পাশ্চাত্য বিধানে নাহি কোন কাজ !

দূর কর মিথ্যা ভণ্ডের ভণ্ডামি ।

বৈষম্য বিচার কিসের ? কে তুমি ?

আমি তুমি ভিন্ন কি আছে সংসারে ?  
তুমি পূজ—আমি পূজিব তোমাতে ।

---

সরস্বতী পূজা ।

১

কবি কুঞ্জবনে তুলিতে কুসুম  
কে যাবি রে সাথে আয়,  
যদি যুড়াবি তাপিত প্রাণ ।  
শোক, তাপ, জরা, যন্ত্রণা তথায়  
অনায়াসে ভুলা যায় ;  
ভবে সেই মাত্র সুখ স্থান !

২

দেবতা-বাহিত্রিত ত্রিদিব আলয়  
কতই বা শোভা ধরে ?  
সে'ত কপোলকলিত কথা ।  
কবি-হৃদ-কুঞ্জ অকল্লিত স্বর্গ  
দেখসে অবনী'পরে,  
আহা, সকলি সুন্দর তথা !

৩

কোথা পারিজাত দেবের পীযুষ,  
 ইন্দ্রের অমরাবতী,  
 তা'কি দেখেছ কখন ও চখে ?  
 ভ্রান্ত মানবের সুখতৃষ্ণা হেতু  
 বাসনা প্রবল অতি,  
 তাই স্বরগ স্বপনে দেখে ।

৪

কত উচ্চ স্থানে আছে সে স্বরগ,—  
 স্বরগই কত দূর ?  
 স্বর্গ কোথায় আছে কে জানে ?  
 কবি-হৃদ-স্বর্গ সীমামূঢ় রাজ্য  
 জীবন্ত অমরাপুর  
 অতি পবিত্রে উন্নত স্থানে ।

৫

থাকে যদি সুখ, থাকে পারিজাত,  
 ইন্দ্রের অমরাবতী,  
 তবে আছে তা' কবির হৃদে ।  
 থাকে যদি সুখ, শান্তি, স্বাধীনতা,  
 পবিত্র ভকতি, প্রীতি,  
 তবে আছে তা' কবির হৃদে ।

৬

কবি কুঞ্জবন জীবন্ত নন্দন  
স্বর্গাদপি গরীয়সী;  
আমি কি দিব তুলনা আর ?  
রুক্ষে মোক্ষ ফলে, ফুলে সুধা গলে,  
পত্রে শান্তি ছায়ারশি,  
মূলে ভক্তি প্রেম ধারা তা'র ।

৭

অনন্ত প্রসর বিবেক প্রান্তর  
প্রেমের পরিখা বেড়া,  
তা'হে অমৃত প্রবাহ বহে ।  
(মাঝে) অতি মনোহর শান্তি সরোবর,  
মোক্ষ-রুক্ষ, বল্লী-বেড়া,  
চরে চৈতন্য-সারস তা'হে ।

৮

শ্বেত স্বচ্ছদল জ্ঞানের কমল  
প্রস্ফুটিত সারি সারি,  
তা'হে প্রীতি-মকরন্দ ক্ষরে ।  
মনোভঙ্গ তা'য় মত্ত, মধু খায়  
ফুলে ফুলে সবে উড়ি' ;  
সুখ-প্রমত্ত বাক্য ছাড়ে ।

৯

কুঞ্জ-চারি-তীরে, বৃক্ষ চারিধারে  
 ফলপুষ্প পত্রে নত,  
 চির অশুষ্ক অচ্যুত তাহা ।  
 সূর্য-সমীরে সূর্য-বিতরে,  
 বিশ্ব তাহে আমোদিত,  
 সুখ কিরূপে প্রকাশি, আহা !

১০

নিকুঞ্জ কুটীরে কল্পনা কুহরে,  
 প্রতিভা পাপিয়া গায়,  
 স্বরে অমিয় লহরী উঠে ।  
 অবনী মোহিয়া আকাশ শব্দিয়া  
 উচ্ছ্বাস উঠিয়া তায়  
 স্বর অম্বর ভেদিয়া ছুটে !

১১

সরসীর কূলে লতাকুঞ্জ তলে  
 ভাবুক প্রেমিকচয়,  
 বসি' পুলক পূর্ণিত প্রাণে ।  
 কাব্য-কুন্দফুলে মালা গাঁথি' গলে  
 পরি'ছে মাধুরীময়,  
 কিবা গায় মধুমত্ত মনে !

১২

পুষ্প মকরন্দ পরাগ স্রুগন্ধ  
রসাল পীযুষ ফল,  
সব যদৃচ্ছা ভুঞ্জিছে সুখে ।  
ইচ্ছা যার যাহা, লভি'ছে সে তাহা,  
না চাহি যতন বল,  
কবি কল্প রক্ষতলে থেকে

১৩

কিসের অভাব ? কিসের অসুখ ?  
যা চাহ, তা মিলে তথা ।  
তথা অনন্ত ঐশ্বর্য রাশি ।  
তথায় যা নাই, ব্রহ্মাণ্ডে তা নাই,  
আর কি কহিব কথা,  
সুখ উথলিছে দিবানিশি !

১৪

মণিময় খাতে প্রেমধারা পাতে  
বহে নদী চতুষ্টয়,  
নাম, ধর্ম অর্থ কাম মোক্ষ ।  
অনন্ত প্রবাহে নিত্য নদী বহে,  
কে জানে কোথায় যায় ।  
তীরে দেব নর যক্ষ রক্ষ

১৫

বসি', পরপারে যেতে ইচ্ছা করে,  
 যাইতে পারে না কেহ,  
 পারী জমেনা সময় মাঝে ।  
 কালের আশ্বাসে আছে তা'রা ব'সে,  
 যায় নিশা, আসে অহঃ,  
 নিত্য সাক্ষী রাখি' প্রাতঃসাঁঝে ।

১৬

আজি শুভ দিন স্বর্গমর্ত্য জুড়ি'  
 আনন্দ-উন্মত্ত সবে,  
 ভবে বসন্ত পঞ্চমী তিথি ।  
 দেব নর যক্ষ রক্ষ গন্ধর্ব্বাদি  
 জয় জয় জয় রবে  
 গায় জ্ঞানদা ব্রহ্মাণী স্তুতি ।

১৭

শান্তি-সরোবরে জ্ঞানাম্বুজ'পরে  
 জ্ঞান-রাজরাজেশ্বরী,  
 সঙ্গে বিদ্যা বুদ্ধি সখী দ্বয়  
 বিহরে, অধরে হাস্ত স্খা করে,  
 করে বীণা, আহা মরি,  
 রূপে ত্রিভুবন তনয় !

১৮

বাল্মীকি, ব্যাসাদি, বাণ, ভবভূতি,  
ভারবি, শ্রীহর্ষ কবি,  
তথা কালিদাস মহামতি  
ল'য়ে কাব্য পুষ্পহার পুষ্পাঞ্জলি মা'র  
পাদপদ্ম'পরি' মঁপি  
কিবা গাই'ছে স্রস্বরে স্তুতি ।

১৯

দুঃখী বঙ্গ কবি কোথায় কি পা'বে ?  
দারিদ্র্য সম্বল সার,  
আর কি আছে ?—কি দিয়া পূজে ?  
অন্ধ খণ্ডাতুর বধির যে জাতি,  
স্বক্ষেতে দাসত্ব-ভার,  
গৃহে দুর্দশা-দুন্দুভি বাজে !

২০

তা'রা কভু পারে ষোড়শোপচারে  
জ্যেষ্ঠ শ্রেষ্ঠ পুত্রসম,  
হ্যা মা ! পূজিতে ও পদতল ?  
পূর্ণত্রয়ময়ি কুপাময়ি অম্ব !  
জগদম্বা তুমি সত্য,  
তুমি একমাত্র আশা-স্থল ।



২১

প্রসন্নে ! বরদে ! জ্ঞানদে ! মোক্ষদে !

দে মা, পদ দুটী হৃদে,

আমি একান্তে ধরেছি তোরে ।

গাঢ় মন প্রাণে প্রেমাক্রম চন্দনে

চর্চি' জ্ঞান-পুষ্প পদে

যেন দিতে পারি প্রাণ ভ'রে ।

শ্মশানদর্শনে ।

১

এই ভাগীরথী, এই তীর ভূমি,

ওই ভয়ানক শ্মশান সৈকত !

ওই চিতা-বহি অনন্ত জিহ্বায়

দংশে নর-দেহ,—গর্জে মেঘবৎ !

২

ওই স্তূপে স্তূপে শ্মশান-কলস,

ওই স্তূপে স্তূপে কঙ্কাল-কপাল !

ওই স্তূপে স্তূপে চিতা-ভস্ম-রাশি,

ওই লক্ষ লক্ষ গৃধ্ররাজপাল !

৩

ওই ফিরে যত শবডুক্ পশু,  
কুকুর শৃগালে করে কোলাহল ;  
ওই শুন শুন বিকট চীৎকার,  
ওই দেখ দেখ পিশাচের দল !

৪

ওই দেখ দেখ বিকট ব্যাপার !  
ওই দেখ মুখে রুধিরের ধার !  
ওই দেখ থায় দন্ধ নরমাংস,  
ওই দেখ দেখ চাহিয়ে আবার

৫

মহাশ্মশানেতে ফিরে মহাকাল  
করে ভীম গদা, বিদ্যুৎ ঝলকে,  
সঙ্গে শতদূত, যম-অবতার,  
হাসে থিট থিট, ঝলকে ঝলকে

৬

উগারি অনল, চক্ষু রক্ত লোল  
দীর্ঘ পাণ্ডু গুহ্ম, শ্মশ্রু ভয়ঙ্কর !  
ভীম আশ্বালনে ফিরে প্রেত-ভূমে,  
নররক্তাহুতি ঢালে চিতা'পর !

৭

দেখ পুনঃ দেখ চতুর্দিকে চেয়ে,  
 এরূপ আশ্চর্য্য দেখনি কখন ;  
 অষ্টাদশ কোটি অপোগণ্ড শিশু  
 দাঁড়া'য়ে সম্মুখে হাসি'ছে কেমন !

৮

বালকের মতি নাই জ্ঞান-লেশ,  
 নাই সুখ দুঃখ হিতাহিত বোধ ;  
 নাই ভয়, নাই শোক মনস্তাপ,  
 অভাগারা সব নিতান্ত নির্বোধ !

৯

ওই যে অনল শ্মশান-সম্মুখে  
 জ্বলি'ছে অনন্ত জিহ্বা বিস্তারিয়া ;  
 জননী ওদের পুড়ি'ছে উহাতে ;  
 অজ্ঞান শিশুরা দেখি'ছে চাহিয়া !

১০

দেখি'ছে কোতুক ; হাসি'ছে অহ্লাদে  
 চিতানলে ভাবি' অনল-উৎসর !  
 অভাগা শিশুরা কিছুই বুঝে না !  
 কালি যে কি হ'বে—নাই অনুভব ।

১১

পুড়ি'ছে জননী, পুড়ি'ছে সোদর,  
পুড়িবে অচিরে আপনারা সব !  
এ সকল কথা কিছুই বুঝে না,—  
দাঁড়া'য়ে দেখি'ছে অনল-উৎসব ;

১২

আহা ! আজ সপ্ত শত বর্ষ গত  
জনকের মৃত্যু হ'য়েছে বিপাকে,  
শোক-জর্জরিতা অভাগী জননী  
ছিল দুগ্ধপোষ্য শিশু ক'টা দেখে !

১৩

সপ্ত শত বর্ষ বিধব্রী তস্করে  
নিষ্ঠুর যন্ত্রণা দিয়েছে কেবল ;  
লুণ্ঠেছে ভাণ্ডার, হরেছে সতীত্ব !  
যাহা যাহা ছিল, হরেছে সকল !

১৪

বীরের গৃহিণী, বীরের জননী,  
এত অপমান সহিতে কি পারে ?  
ঘোর মনস্তাপে ত্যজিল পরাণ,  
শিশুদিগে করি অনাথ সংসারে !

১৪

মরেছে জননী!—কেবা বুঝে তাহা?  
 মৃত্যু মা'র বুকে পড়িয়া সকলে,  
 করে স্তন পান, ধাধসে পরাণ  
 রহে কোন রূপে ঈশ্বর কোশলে !

১৫

ঈশ্বরের জীব বাঁচে কোনরূপে ;  
 নাহি শিক্ষা, দীক্ষা, জ্ঞান-সংস্কার  
 জীবন্মৃতপ্রায় দুঃখপোষ্য গুলি  
 উদরের তরে ফিরে আপনার !

১৬

সব অপোগণ্ড অদৃষ্টক্রমেতে,  
 কয়টি বালক হ'ল জ্ঞানবান্ ;  
 জানিল আমরা কাঙ্গালি সংসারে,  
 জানিল,—জননী ত্যজেছে পরাণ !

১৭

জানিল জননী অকালে, বিপাকে  
 হারা'য়েছে স্বামী, বীর পুত্রগণে !  
 জানিল জননী তস্করের করে  
 হারা'য়ে সতীত্ব অমূল্য রতনে,

১৮

ঘোর অপমানে ত্যজেছে পরাণ !  
 মৃত্যু মা'র দুখে জীবিত আমরা !  
 ভাবিয়া দুর্দশা, শ্মশানে বসিয়া  
 দুই একবার কাঁদিল তাহারা !

১৯

আপনার দুঃখে কাঁদিতে শিখিল,  
 দেখিল বিধাতা, দেখিল শমন !  
 ছদ্মবেশী কাল করিল বঞ্চনা,  
 সুধা বলি দিল গরল ভীষণ !

২০

সুধা ভাবি' নিল বিষ-পাত্র করে,  
 অমর হইব ভাবিল বালক ।  
 যে খাইল বিষ সেই অচেতন,  
 সেই পরিহরি' গেল ইহলোক !

২১

অকালেতে কাল হরিল তাদিগে,  
 না জানি কি আছে অদৃষ্টে আবার,  
 কোথা গেলে, ভাই ! এস একবার,  
 দেখে যাও আজ বসে হাহাকার !

২২

কোথা, প্যারী দাদা ! কোথা গেলে ভাই !

সজ্জন সুশীল সত্যপরায়ণ !

নিদারুণ শোক-বজ্র মারি' হৃদে,

কোথা গিয়ে বসি' রহিলে এখন ?

২৩

অবোধ হৃদয় সকল ভুলিয়া

ধৈর্য্য ধরেছিল তোমার আশায় !

তুমি, দাদা ! শেষে এই কি করিলে ?

ডুবাইলে ভেলা ভরা দরিয়ায় !

২৪

অজ্ঞান শিশুরা মরে বিষপানে,

সহিত না তাহা তোমার হৃদয়ে !

দাসত্ব-নিগড়ে বদ্ধ ছিলে, তবু

কত দিক্ রেখেছিলে বুক দিয়ে !

২৫

আজ, প্যারী দাদা ! নূতন যন্ত্রণা,

নূতন শোকেতে কাঁদাইয়া, ভাই !

জননীর সঙ্গে একই চিতাতে

পুড়ি'ছ, দাঁড়া'য়ে দেহিতেছি তা'ই !

২৬

আজ, গুণ-ধাম ! তব হেন ভেয়ে,  
 হারা'য়েছি, আর পাব না দেখিতে !  
 আজ, দাদা ! এসে দেখে যাও চক্ষে  
 কুকুর-কীর্তন হ'য়েছে বঙ্গিতে !

২৭

কে আছে আমার ব্যথার ব্যথিত ?  
 মরমের ব্যথা কাহারে জানাই ?  
 যে অনল হৃদে জ্বলি'ছে রে, তাহা  
 বক্ষঃস্থল চিরি' কাহারে দেখাই ?

২৮

অন্তস্তলস্পর্শী যেই বহি-শিখা  
 হৃৎপিণ্ড দগ্ধ করি'ছে আমার ;  
 এ'র কি দারুণ ভয়ঙ্কর জ্বালা !  
 যা'র জ্বালা, সেই জানে আপনার !

২৯

হৃদয়-চিতাতে জ্বলি'ছে যে বহি,  
 সলিল সিঞ্চিলে লক্ষ বর্ষ তা'য়  
 নিবিবে না, পুন হইবে প্রবল ;  
 রাবণের চিতা জলে কি নিবায় ।



৩০

তবে কি নির্বাণ হ'বে না এ চিতা ?

তবে কি হইবে ভস্ম এ হৃদয় ?

তবে কি এ জ্বালা স'ব চির দিন ?

তবে কি এ চিতা নিবা'বার নয় ?

৩১

নিবিবে না কেন ? হইবে নির্বাণ,

নিবায় যাহাতে, কর দেখি তাই ।

সলিলে না নিবে, নাই বা নিবিল ?

অশ্রুরের রক্ত ঢাল দেখি, ভাই !

৩২

ধর খড়গ—কাট রুধিরের গঙ্গা !

তোল রক্ত—ঢাল কলসী কলসী,

নিবিবে না কেন ?—অবশ্য নিবিবে !

হৃদয়ের বহিঁ যা'বে কোথা ভাসি' !

৩৩

রক্তাহুতি দিয়া নিবাও এ চিতা ;

নহে সংক্রামক হইয়া অনল,

ব্যাপি' দশ দিশি দহিবে প্রত্যেকে,

দহিবে জীবন—দহিবে সকল !

পিতৃতর্পণ ।

১

(আজ) মহাবিষুব সংক্রান্তি ভারতে,  
এস, ভাতৃগণ, এস গঙ্গাতীরে,  
এস, ভাই, আজ বহুদিন অন্তে  
তুমি পিতৃলোকে তর্পণের নীরে !

২

জাহ্নবীর জলে স্নান ক'রে, ভাই,  
ধর কোষা কুশ পবিত্র হইয়া ;  
কায়মনপ্রাণে ভাবি' পিতৃপদ,  
তোল গঙ্গাজল কোশায় ভরিয়া ।

৩

হিন্দুবংশে যদি হিন্দু থাক কেহ,  
থাক রে স্পুত্র বংশের তিলক,  
তর্পি তিন কোষা গঙ্গোদক তবে  
সন্তুষ্ট করহ আজি পিতৃলোক !

৪

জন্ম বৃদ্ধি সুখ ষাঁ'দের হইতে,  
হেন পিতৃলোকে আছ রে ভুলিয়া ?  
তুষার্ত পিতরঃ শুদ্ধকণ্ঠে ওই  
ডাকে শূন্যপথে—শুন কাণ দিয়া !—

৫

“হিন্দুবংশে যদি হিন্দু থাক কেহ  
না হও কুপুত্র কুলের অধম ।  
হও হিন্দুবীর্য্যে যথার্থ সন্তান,  
তবে পিতৃদুঃখে ব্যথিবে মরম !

৬

“তবে পিতৃব্যথা বাজিবে পরাণে,  
দিবে জলপিণ্ড তিতি’ অশ্রুণীরে ।  
‘শুনি’ পিতৃলোক দুর্দশা-কাহিনী  
কখনো র’বে না নিশ্চিত অন্তরে !

৭

“পুত্র রে ! কি কব দুঃখের বারতা ?  
সহস্র বৎসর আছি উপবাসে !  
আছি তৃষ্ণাতুর শুক্লরুদ্ধকণ্ঠে  
দীন হীন ক্ষীণ জীবন্মৃত বেশে ।

৮

“নয়নের অশ্রু নয়নে শুকায়ে,  
সন্তাপের শ্বাস মিশায় বাতাসে ।  
আজ কত বর্ষ কেমন যে আছি,  
ভ্রমেও সে কথা কেহ না জিজ্ঞাসে !

৯

“যে দিন হইতে হিন্দু-ভাগ্য-শশী  
ঢাকিয়া গিয়েছে যবন-জলদে,  
সে দিন হইতে আছি উপবাসী !  
আছি তৃষ্ণাতুর ! পুত্র রে জল দে !

১০

“যে দিন হইতে আর্য্য-শৌর্য্য-সূর্য্য  
গ্রাসিয়া ফেলেছে যবন-রাহতে,  
সে দিন হইতে আছি উপবাসী !  
আছি তৃষ্ণাতুর বিগুপ্তকণ্ঠেতে ।

১১

“যে দিন হইতে আর্য্যরাজলক্ষ্মী  
হরিয়া ল’য়েছে যবন-তস্করে ।  
সে দিন হইতে আছি উপবাসী,  
আছি তৃষ্ণাতুর—আছি প্রাণে ম’রে !

১২

“যে দিন হইতে ইন্দ্রের অমরা  
পিপাচের স্পর্শে অশুচি হয়েছে,  
সে দিন হইতে আছি উপবাসী !  
সে দিন হইতে সকলি গিয়েছে ।

১৩

“যে দিন হইতে এ কনক পুরী  
 বানরে পোড়ায়ে করিয়াছে ছাই,  
 সে দিন হইতে আছি উপবাসী,  
 সে দিন হইতে আর কিছু নাই !

১৪

“যে দিন হইতে সিংহের আহাৰ  
 কুকুর শৃগালে করেছে ভক্ষণ,  
 সে দিন হইতে আছি উপবাসী !  
 পুত্র রে ! সকলি নিয়তি-লিখন !

১৫

“যে দিন হইতে সোণার সংসার  
 পরের পদেতে বিকা'য়ে গিয়েছে  
 সে দিন হইতে শুকা'য়েছে সিন্ধু,  
 হিমাদ্রির শৃঙ্গ নত হইয়াছে ।

১৬

“যে দিন হইতে যবন-সমুদ্র  
 উদ্ধাল তরঙ্গে প্রবেশি' ভারতে,  
 গিরি-নদ-নদী-সিন্ধু-জনপদ  
 ভাসা'য়ে দিচ্ছে দুর্দম স্রোতেতে ।

১৭

“সে দিন হইতে সব অপবিত্র !

পুত্র রে কাজেই আছি উপবাসী ।

ভারত-সমুদ্রে নাই জল-বিন্দু,

যাহা দেখ, উহা হিন্দু-রক্তরাশি !

১৮

“গঙ্গা যমুনাদি সপ্ত নদ নদী

দেখিতেছ চক্ষে আজো বহিতেছে

জল নহে উহা হিন্দুদের রক্ত,

হিন্দু-মজ্জা-মাংসে বালুকা জন্মেছে

১৯

“দেখি’ছ, লতায় ফুটে যে কুসুম ;

বৃক্ষশাখে ছলে সুরসাল ফল ;

ক্ষেত্রে শোভে শস্য নয়নরঞ্জন,

কি দেখি’ছ ? হিন্দু-মেদ ও সকল !

২০

“দেখি’ছ স্মেরু নীল-বিস্ফাটল,—

হিন্দুদের অস্থি কঙ্কাল-প্রমাণ ।

দেখি’ছ যে সব দেশ জনপদ,

কি দেখি’ছ ?—উহা হিন্দুর শ্মশান !

২১

“কি দিয়া তর্পণ করিবি রে পুত্র ?  
 হিন্দুরক্ত বিনা পানীয় ত নাই !  
 তবে যদি পার—বলি উপদেশ,  
 পার বা না পার—চিন্তা দেখি তাই !

২২

“হেন পুত্র যদি থাক কোন জন,  
 ভাঙ্গিয়া গঠিতে পার এ সংসারে ?  
 ভারত-সমুদ্র, সপ্ত-নদ-নদী  
 ছেঁচিয়া ফেলিতে পার স্থানান্তরে !

২৩

“আবার সগর বংশ যদি জন্মে  
 ভীম বাহুবলে কাটে পারাবার !  
 বংশ উদ্ধারিতে জন্মে ভগীরথ,  
 আনে দ্রবময়ী গঙ্গারে আবার ;

২৪

“আবার যদ্যপি জন্মে এক ভীষ্ম,  
 নব কুরুক্ষেত্রে করে রে তর্পণ,  
 আকণ্ঠ পূরিয়া পান করি তবে,  
 করি যুগান্তের ভূষণ নিবারণ !

২৫

“আবার যদ্যপি জন্মে এক রাম ;  
কোদণ্ড ফলায় কাটিয়া সরযু,  
আত্মক্লান্ত প্লাবিতা করে রে তর্পণ,  
তবে তৃষ্ণা শান্তি হ’তে পারে কিছু !

২৬

“যে শরশয্যায় আছি রে শয়িত,  
যে অমল-শিখা জ্বলে রে বন্ধেতে !  
আবার যদ্যপি জন্মে ধনঞ্জয়,  
ভোগবতী গঙ্গা আকর্ষি’ শরেতে

২৭

“নিবায় এ বহি, তবেই নিবিবে,  
অন্যথা এ দাহ দহিবে ভীষণ !  
থাক যদি কেহ রাম, ধনঞ্জয়,  
কর্ণ, ভীমসেন—করহ তর্পণ !

২৮

“থাক যদি কেহ বংশে ভগীরথ,  
বাজ্রা’য়ে দুন্দুভি আন জাহ্নবীরে ;  
আত্মক্লান্ত প্লাবিতা করহ তর্পণ ;  
মুক্তি লাভি’ সবে যাই স্বর্গপুরে ।



ভুবনমোহিনী প্রতিভা ।

অবনী-বৈচিত্র্য ।

১

সাগর-অম্বর বিশাল মেদিনী  
শয়িত অনন্ত অম্বর-শয্যায় ;  
আদিত্য আপনি আলোক সঞ্চারে,  
শিওরে পবন চামর ঢুলায় ।

২

প্রিয় সহচরী প্রকৃতি সুন্দরী  
আপনার হস্তে পরিচর্যা করে ।  
অজরা অমরা রূপসী ঘোড়নী  
বিলাস বিভঙ্গে ভুলায় সংসারে !

৩

রূপে কি গৌরবে, মানে কি বৈভবে,  
নাহিক জীবন্ত তুলনা যাহার,  
হেন নারী-রত্ন লভিব বলিয়া,  
না হয় সংসারে ভাবনা কাহার ?

৪

আশায় উন্মত্ত মানবের মন  
বুঝে না উহার নিগূঢ় বারতা ।  
ও যে সর্বনাশী রাক্ষসী বিশেষ  
কালভুজঙ্গিনী মণিতে মণ্ডিতা ।

৫

যে ছুঁয়েছে ওরে সেই মজিয়াছে ;  
 তাহারি জনম গিয়াছে কাঁদিতে !  
 সেই সে বুঝেছে ও যুগ-তৃষিকা  
 ক্ষণিক তৃষিত কুরঙ্গে ধাঁধিতে !

৬

কোথা যদুকুল ? কোথা রঘুকুল ?  
 কোথায় কোঁরব পাণ্ডবের দল ?  
 কোথায় হস্তিনা ? কোথা ইন্দ্রপ্রস্থ ?  
 কোথায় দ্বারকা, কোথায় কোশল ?

৭

কোথা আফ্রাসিয়াব ? কোথায় রোস্তম ?  
 কোথায় তৈমুর, যামুদ, চেঙ্গিজ ?  
 কোথা বাহু-বল-গর্বিত-স্পর্দিত  
 দুর্দম মোগল পাঠানের তেজ ?

৮

সাহা কি সুলতান, মোগল, পাঠান,  
 আরব আফগান কোথায় এখন ?  
 কোথা সে আকবর ভারত-ঈশ্বর ?  
 কোথা কহিনুর ময়ূর-আসন ?

৯

কোথা হেরেষ্ঠাল, আলেক্-জাণ্ডার ?

কোথা বোনাপাট বীর-চুড়ামণি ?

কোথা হানিবল ? কোথায় সিজর ?

কোথা সে দিনের ক্লাইব কেরানী ?

১০

কোথায় কণিক, চাণক্য চতুর ?

কোথায় মেকিয়াভেলি ভয়ঙ্কর

কুট-বুদ্ধি-দাতা, কঠিন হৃদয় ?

সত্য-বিসম্বাদী প্রচ্ছন্ন তস্কর ?

১১

সকলে গিয়েছে, সকলি হয়েছে,

রয়েছে কেবল কীর্তির প্রাঙ্গন !

ঘোর হত্যাভূমি বিকট শ্মশান

কুরুক্ষেত্র আদি শত নিদর্শন !

১২

দেখিয়া না বুঝে অজ্ঞান মানব

আশার কুহকে উন্মত্ত জীবন ।

দাঁড়াইয়া সেই শ্মশানভূমেতে

আবার দেখায় নটের নর্তন !

১৩

আবার দুরাশা চরিতার্থ তরে  
চতুর্দিকে ওই ছুটি'ছে উন্মাদ !  
জলন্ত পাবকে পড়িতে পতঙ্গ  
আবার ছুটি'ছে একি এ প্রমাদ ?

১৪

আমার আমার আমার বলিয়া  
করি'ছে পাগলে ঘোর গণ্ডগোল !  
তোমার কেবল চরমের শয্যা  
চারি হস্ত ভূমি—সমাধি-সম্মল !

১৫

কারু নয় পৃথ্বী—পৃথ্বীর সবাই ;  
প্রকৃতি স্বয়ং বলে এই কথা ।  
রাজত্ব দাসত্ব সর্ববশেষে শব্দ  
কে আনিল ভবে, সে এখন কোথা ?

১৬

পাই যদি সেই দস্যুরে আবার,  
শুধাই তাহার গোটা দুই কথা !  
দেখি একবার কেমন সে জন,  
দেখাই তাহারে মরমের ব্যথা !

১৭

সমাজের সৃষ্টি কে করিল আগে ?

রাজত্ব দাসত্ব তাহারি স্বজন,  
তাহারি সৃজিত অন্ধুরে সংসারে  
বিষময় ফল ফলি'ছে এখন !

১৮

কোথা ভাই সব প্রকৃতির পুত্র !

সমাজ-শৃঙ্খল বিমুক্ত, স্বাধীন,  
সদানন্দচেতা, সত্য-ব্রহ্মজ্ঞানী,  
আত্ম-পর-শূন্য, স্বার্থ বোধহীন !

১৯

দেখ'সে তোমরা আমাদের দশা !

আমাদের দুঃখ, দারিদ্র্য, যন্ত্রণা,  
রোগ, শোক, তাপ, স্বার্থ-কণ্ডূয়ন,  
পরার্থীন প্রাণে প্রহার-বেদনা !

২০

দেখে যাও আজ সংসারের দশা,

সকলি বিকৃত হ'য়েছে এখন !  
দেখে যাও, ভাই ! আমাদের পদে  
দাসত্ব সেজেছে, দেখিতে কেমন !

২১

দেখে যাও, ভাই ! ভবরঙ্গ-ভূমে  
নটের কল্লিত নাট্য-অভিনয় !  
ভাঁড়ের ভণ্ডামী, পুতুলের নৃত্য,  
পাগলের হাস্য কৌতুহলময় !

২২

দেখে যাও, ভাই ! বিকট শ্মশানে  
পিশাচের ঘোর কলহ কোন্দল,  
হিংসা, নিষ্ঠুরতা, নর-রক্ত-পান ;  
শূন্য-বিদারিত ভয়ঙ্কর গোল !

২৩

দেখে যাও এক বীভৎস রঙ্গক্ষেত্রে  
রঞ্জিত পৃথিবী, পূর্ববৎ নাই ;  
এখন এ পৃথ্বী দেখিয়া তোমরা  
কখনো চিনিতে পারিবে না, ভাই !

২৪

ঐ শুন দূরে রুসিয়া হুঙ্কারে,  
দহে টার্কী ঘোর অন্তর দাহেতে ;  
ফ্রান্স ক্ষত দেহে দিতেছে প্রলেপ,  
প্রসিয়া গম্ভীর গৌরব-মদেতে ।

২৫

দু'দিক্ লইয়া অস্থির ইংলণ্ড,  
 তথাপি বাসনা দুই দিক্ চাই !  
 রহস্য দেখিয়া হাসিছে পাঠান,  
 আতঙ্কে কম্পিত ভারত সদাই ।

২৬

বড়াই লইয়া ব্যস্ত বটনীয়া,—  
 কত দিকে কত দেখায় চটকু ;  
 কন্যারে ভৎসিয়া, বধূকে বুঝায়,  
 তথাপি শয়তান না মানে আটক !

২৭

এক রজ্জু দ্বারা বিংশ কোটি নরে  
 বাঁধিয়া নাচায়, যেরূপে বাসনা,  
 দীর্ঘকাল পরে পদাঘাতে শীর্ণ  
 অর্দ্ধমৃত জীবে যা কর করুণা ।

২৮

মড়ার উপরে খাঁড়ার আঘাত,  
 বলিতে কহিতে নাহিক সংসারে !  
 নিজজীবের রক্ত করিয়া শোষণ,  
 জীবন্তের পদ পূজি'ছে সাদরে !

২৯

আজ রাজপুত্র এসেছে ভ্রমিতে,  
দাও ভারতীয়া দেহের রুধির ;  
আজ কাবুলিয়া নাড়িয়াছে মাথা,  
দাও ভারতীয়া কাটিয়া শরীর ।

৩০

রুসিয়ায় বল দেখাবার তরে  
ভিক্টোরিয়া হ'বে ভারত-ঈশ্বরী ;  
অবনত মাথে, আয় ভারতীয়া !  
দে দেহের রক্ত হুৎ-পিও ছিঁড়ি ?

৩১

কি করে ভারত ? ভারত নিজ্জীব,  
বিংশ কোটি মৃত লইয়া অশ্বতে  
পৃথিবীর মাঝে ভারত শ্মশান !  
করে বুটনীয়া যা' ইচ্ছা মনেতে ।

৩২

নাই ভারতের তীক্ষ্ণ তরবারি,  
জানে না ভারত ছাড়িতে হুক্কার !  
মার আর রাখ, যা' কর বুটন,  
যা' কর সকলি সঙ্গত তোমার !



৩৩

তুমি বলীয়ান্ দুর্বল ভারত,  
 ভারত তোমার ক্রীড়ার পুত্তল,  
 তুমি হর্তা কর্তা বিধাতা উহার,  
 তুমিই উহার ভরসার স্থল !

৩৪

মার কাট আর শোষণ রুধির,  
 বিশ্বাসঘাতক নহে ভারতীয়া ;  
 প্রত্যয় না হয় খোল ইতিহাস,  
 শঙ্কটে ভারত রাখে বুক দিয়া !

৩৫

অসত্য বর্বর আর যত বল  
 রাজদ্রোহী নয় হিন্দুর সন্তান ।  
 নহে মিথ্যাবাদী কপট, বঞ্চক,  
 সত্য রক্ষা হেতু দিতে পারে প্রাণ !

৩৬

সরল স্নেহের কাঙ্গাল আমরা  
 স্পর্শ বাক্যে রুষ্ট হইয়া না, বুটন !  
 সরল হৃদয়ে বলিয়াছি যাহা,  
 আবার বলিব মনের বেদন ;—

৩৭

শুন বা না শুন, ইচ্ছা সে তোমার,  
 স্পর্শ স্পর্শ ক'ব না করিব ডর ;  
 নিগ্রহের চক্ষে দেখ যদি, তাহে  
 দুর্বলের বল আছেন ঈশ্বর !

৩৮

এই যে ভারত জীবন্ত শ্মশান,  
 মানব-গৌরব-সমাধি-প্রাপ্তগণ ।  
 কত হ'ল গেল সম্রাট বাদশা,  
 তাহাদের চিতা নিভেছে এখন !

৩৯

যা' হ'বার তাহা হইয়া গিয়াছে,  
 দেখেছে ভারত অনেক উৎসব,  
 দেখেছে অনেক রাজসূয় যজ্ঞ,  
 দেখেছে অনেক সম্পদ বৈভব !

৪০

যখন ব্রটন লভে নাই জন্ম,  
 তখন ভারত রাজরাজেশ্বরী,  
 সে দিনের শিশু হইয়া ব্রটন  
 উপেক্ষে ভারতে, ওই দুঃখে মরি !

৪১

রুসিয়ার ভয়ে রাজসূয় কেন ?  
 কেন আড়ম্বর সামান্যের তরে ?  
 বিশ্বাস সারল্যে ভুষিলে ভারতে  
 শত রুসিয়ায় কি করিতে পারে ?

৪২

ভারতের বল করিয়া শোষণ,  
 বিপক্ষ দমন সহজে হ'বে না ;  
 দিল্লীর দরবার আড়ম্বর সার,  
 চটকে কটক আটক র'বে না !

৪৩

বিপদে সম্পদে ভারত তোমার,  
 দাও ভারতের হস্তে তরবার,  
 একত্রে সদন্তে বিংশ কোটি নরে  
 জয় জয় শব্দে ছাড়ুক হুকার !

৪৪

ভারত যদ্যপি পায় তরবারি,  
 ক'র সাধ্য তবে প্রবেশে এথায় ?  
 থাকুক রুসিয়া—রুস কোন্‌ তুচ্ছ ?  
 দিতে পারে পৃথ্বী জিনিয়া হেলায়

৪৫

দাও স্বাধীনতা, খোলহ শৃঙ্খল,  
দেখ ভারতের কত বাহুবল !  
তাহা না করিয়া শুষিলে রুধির,  
আপনার দোষে মজা'বে সকল !

আশা-মরীচিকা ।

১

নিত্য মনোহর শ্যামল সুন্দর,  
অগাধ অপার গম্ভীর গগন,  
নিত্য বিরাজিত বাহ্নন-অতীত,  
আত্মা-শ্রান্তিহর—শান্তির কারণ ।

২

কাল-শৈল-শির-আসনোপবিষ্ট,  
পরম চরম বিজয়ী সত্রাট্,  
মহাজ্ঞান-প্রভা—মুকুট-কিরিটী,  
স্বতঃ পরন্তপ—পুরুষ বিরাট্,

৩

প্রকৃতির বজ্র-গদা-দণ্ডধারী,  
 প্রকৃত প্রত্যক্ষ সিদ্ধ সত্য প্রভো,  
 সাক্ষাৎ সাযুজ্য, সালোক্য, নির্বাণ,  
 জ্ঞানময় কান্তি ধ্যানময় বিভো !

৪

এ বিশ্ব-ব্যাপার কার্য্য কারণ্যাদি,  
 অদ্ভুত অনন্ত সাম্য শক্তিময়,  
 অদ্ভুত মহিমা, মায়ার কুহকে  
 বিমুক্ত ব্রহ্মাণ্ড ! হায়, কি বিস্ময় !

৫

হায়, জ্ঞান-তৃষ্ণা ! দুরাশা বঞ্চিত,  
 বিদ্যুৎ ধরিতে অন্যাস অশনি ?  
 হায় ! কি উদ্ভ্রান্ত জীবন্ত প্রলাপ,  
 বিমুক্ত পতঙ্গ হেরিয়া অগিনি !

৬

উৎকট তৃষ্ণায় আকুল সংসার !  
 তৃষ্ণা—মহাতৃষ্ণা ! শান্তিমাত্র নাই  
 যে দিকে নিরথ অনন্ত প্রান্তর  
 আশা-মরীচিকা প্রতারে সদাই !

৭

সর্বদা বিমুক্ত উন্মত্ত অন্তর,  
 কি জানি কি ভাবে বুঝিতে পারি না ।  
 অহো বিশ্বময়, ব্রহ্মাণ্ড-বিজয়ী !  
 অহো প্রাণারাম ! আর ভুলায়ো না ।

৮

আর ঘুরায়ো না আশার আবর্তে,  
 দেহি, শান্তি দেহি তাপদগ্ধ প্রাণে,  
 অনন্ত ! অভাবে দেহি মে আশ্রয় ;  
 বড়ই যন্ত্রণা বাসনা-প্রাঙ্গণে !

৯

সম্পদ, সৌভাগ্য, কীর্ত্তি অর্থ-যশঃ,  
 যত লাভ করে মিটিবে না আশা,  
 বাড়িবে যন্ত্রণা, হাহাকার আর  
 বাড়িবে উৎকট আগ্নেয়-পিপাসা !

১০

জ্ঞান-তৃষ্ণা—সত্য—স্বথের সামগ্রী ;  
 কিন্তু জ্ঞান-সিন্ধু কোথায় কে জানে ?  
 মরীচিকা-মুক্ত মনুষ্য-সংসার  
 কি বলে সে কথা বুঝিতে পারিনে !

১১

সমাজ, সভ্যতা, সাম্য, রাজনীতি,  
 বিজ্ঞান, দর্শন কি শিখা'বে জ্ঞান ?  
 উন্নতি বলিয়া উন্নত মানব,  
 কিসের উন্নতি ? এই ত প্রমাণ

১২

প্রত্যক্ষে, পণ্ডিত, মূর্খ, ধনী, মামী,  
 সম্রাট ভিক্ষুকে বৈষম্য বিরোধ !  
 ছি, ছি রে স্বসভ্য উন্নত সমাজ !  
 ছি, ছি সামাজিক সজ্ঞানানুরোধ !

১৩

কুতর্ক-কলুষে আবরিয়া সত্য,  
 কি জ্ঞান শিখা'বে পণ্ডিত ধীমান ?  
 ভ্রমে ভ্রান্ত তুমি স্বার্থের সেবক,  
 উদ্দেশ্য তোমার ক্ষুদ্র, যশ, মান !

১৪

হে সমাজপতি বলিষ্ঠ সম্রাট !  
 তব অভিসন্ধি কে বুঝিতে পারে ?  
 সিন্ধু গুপ্ত করে তোমার কুতৃষ্ণা !  
 তুমি সভ্য-শ্রেষ্ঠ মনুষ্য সংসারে !

১৫

তুমি কূট বিধি ব্যবস্থা-প্রণেতা !  
 তুমি হর্তা কর্তা বিধাতা দুর্ব্বার !  
 তুমিই জগতে শ্রেষ্ঠ ভাগ্যবান,  
 সেবক তোমার সমগ্র সংসার !

১৬

তুমি যাহা বুঝ, অন্যে তা' বুঝে না,  
 তুমি মহামান্য মনুষ্য-সংসারে !  
 তুমি বুদ্ধিমান শ্রেষ্ঠ স্বার্থপর,  
 শ্রেষ্ঠ বলবান ! প্রগতি তোমাতে !

১৭

সাম্য স্বাধীনতা গূঢ় ভিত্তি মূলে  
 তব রাজনীতি, (মুখেই সকল !)  
 কার্যতঃ কঠোর প্রভুত্ব বিস্তারি'  
 সংসারে পরাও দাসত্ব-শৃঙ্খল !

১৮

নিত্য রক্ত, মজ্জা করিয়া শোষণ,  
 বেড়েছে লালসা, সর্বদা তৃষিত !  
 দাঁড়াও, দাঁড়াও, মিটিবে সে তৃষ্ণা !  
 প্রকৃতি সম্প্রতি র'য়েছে নিদ্রিত !



১৯

কত উর্দ্ধে তুমি উঠিবে বলিষ্ঠ ?

কত স্বেচ্ছাচার আচরিবে বলে ?

ভীম-বজ্রাবে জাগিবে প্রকৃতি,

ভীম বজ্রবাহু অপি ওই গলে !

২০

মারি' বজ্রগদা, ভূমে ফেলাইয়ে

শিখা'বে দাসত্ব কেমন যন্ত্রণা !

শিখাইবে কা'রে বলে সাম্য নীতি,

শিখাইবে পরপীড়ন-বেদনা !

২১

শিখা'বে কে তুমি—কেবা সাধারণ,

( সে কথা কথায় শিখাবার নয়, )

দুই চারি দিন যা' ইচ্ছা তা' কর,

অবশ্য হইবে সত্যের উদয় !

২২

অবশ্য ভাঙ্গিবে নিদ্রা প্রকৃতির !

কা'র সাধ্য রোধে সে দুর্দম গতি ?

লক্ লক্ জিহ্বা বিকট ব্যাদান

বিস্তারি' যখন গ্রাসিবে এ ক্ষিতি,

২৩

কে তখন তা'র নিকটে দাঁড়া'বে ?  
 উগারিবে অগ্নি ঝলকে ঝলকে !  
 প্রলয়ের ভীম ঘনঘটা, ঘোর  
 বজ্র নিকলিবে ললাট-ফলকে !

২৪

প্রতি লোমকূপে বজ্রবহ্নি-শিখা  
 বাহিরিবে, দগ্ধ করিবে সংসার !  
 উদ্ভাল অনল তরঙ্গ গর্জিবে,  
 চতুর্দিকে হ'বে ভীম হুহুকার !

২৫

রাজা তুমি—তুমি দাস প্রকৃতির !  
 তব রাজদণ্ড সাধারণ বল,  
 সাধারণ চিত্ত তব সিংহাসন,  
 মুকুট তোমার নহেক কেবল ।

২৬

সাধারণ উহা দিয়াছে তোমায়,  
 অক্ষম দেখিলে লইবে কাড়িয়া,  
 তুমি কে ?—তুমি ত কাষ্ঠের পুতুল !  
 না বুঝ—প্রকৃতি দিবে বুঝাইয়া !

উপহার।

১

ধন্য, শত ধন্য, পূর্ব-বঙ্গ-ভূমি !  
 তুমি রত্নগর্ভা—রত্নপ্রসবিনী,  
 ধন্য পুত্ররত্ন ধরেছ কক্ষেতে,  
 ধন্য পুণ্যবতী, সৌভাগ্যশালিনী ।

২

অতি নিশাঘোরে, নিবিড়ান্ধকারে  
 কংস-কারাগারে দেবকী যেমন,  
 অতি দুঃখ, অতি দুর্দশা দশায়  
 প্রসবিল পুত্র—অমূল্য রতন !

৩

তুমিও জননী, তেমনি দুর্দিনে  
 তেমনি শৃঙ্খলবন্ধন দশায়,  
 তেমনি নিবিড় অন্ধকারাগৃহে,  
 তেমনি গভীর তিমির নিশায়,

৪

প্রসবিলে পুত্র—অমূল্য রতন,  
 দেখিয়া আহ্লাদে গায় আহ্লাদিনী ;

গায় একা, কেহ শুনে বা না শুনে,  
নাই বা শুনিল ?—শুনিব আপনি ।

৫

মনপ্রাণ ভ'রে করি আশীর্বাদ,  
দীর্ঘজীবী হ'ক কুমার তোমার,  
রত্ন-গর্ভে ! পুনঃ প্রসব রতন !  
পুনঃ ধন্য ধন্য গাউক সংসার !

৬

মাতঃ পূর্ব-বঙ্গ ! করি প্রণিপাত,  
আশীর্বাদ কর সোদর সন্তানে,  
মা ! বড় অভাগী—জননী আমার,  
অপুত্রিকা শত পুত্র বিদ্যমান !

৭

আছে মহারাজাধিরাজ সম্ভ্রান্ত,  
গৌরঙ্গ গরবে গর্বিত অন্তর,  
গৌরঙ্গ মন্ত্রেতে দীক্ষিত শিক্ষিত,  
গৌরঙ্গ চরণে ভক্তি গুরুতর !

৮

ছিছি ! ঘৃণা করে । বলিব না আর  
দুঃখে অন্তর্দাহ হ'তেছে সদাই !

জননী-যন্ত্রণা কেহই বুঝে না,  
পুত্র সত্ত্বে বলি অপুত্রিকা তাই !

৯

জননী-বৎসল সন্তান যে ক'টী,  
সকলেই ছুঃখী দরিদ্র সংসারে,  
সকলের শিরে দাসত্ব পসরা,  
উদরান্ন তরে পরদ্বারে ফিরে !

১০

কিরূপে নিকারে জঠর-যন্ত্রণা,  
এই চিতানলে দহে অনুক্ষণ,  
যা'দের এ দশা, তা'রা কি রূপেতে  
করিবে মায়ের দুর্দশা মোচন ?

১১

ভিক্ষুকের কথা কে শুনে কর্ণেতে ?  
ক্ষত দেহে কেবা দেয় প্রলেপন ?  
সদাগুণের শিরে করি' পদাঘাত,  
অসত্ত্বের সেবা করে ধনিগণ,

১২

অজ্ঞান, অশিক্ষা সহচর যার,  
চাটুতা

অর্থশূন্য মিথ্যা সন্মানে যা'দের  
গতি মুক্তি জ্ঞান, যা'দের জীবন

১৩

অর্থমদে ঘোর মত্ত দিবানিশি,  
বিলাসে বিভোর কর্তব্যে বিরত ।  
যা'রা অন্ধকারে নিরখে বিদ্যুৎ,  
নরকে নিরখে স্বর্গ শত শত !

১৪

জাতীয় সাহিত্য জাতীয় মহত্ব  
কাহারে যে বলে তা'রা তা'কি জানে ?  
মিথ্যা আড়ম্বরে সম্মানের তরে  
কাজেই বিক্রীত গৌরঙ্গ চরণে !

১৫

জননীর মুখ উজ্জ্বলিত যা'রা,  
যাদের উদয়ে পবিত্র স্বজাতি,  
যাহাদের ক্ষুদ্র পর্ণ কুটীরেতে  
দিবারাত্রি ভাতে পূর্ণচন্দ্রজ্যোতিঃ !

১৬

তাহাদের মৃদু ক্ষীণ কণ্ঠ স্বর  
ধনীর বিস্তৃত বিলাস ভবন

ভেদিয়া ভিতরে প্রবেশিতে নারে !

তাহে ধনী গর্বে বধির-শ্রবণ !

১৭

অন্ধ আঁখি, হৃদি শুষ্ক মরুময়,

নাই প্রাতি ভক্তি,— সदा হাহাকার !

স্বার্থ স্বার্থ শব্দ ! স্বার্থ উপাসনা,

স্বার্থসিদ্ধি ভিন্ন জানে না ক আর !

১৮

ধন্য পূর্ববঙ্গ রত্ন-প্রসবিনি !

হেন ধনী-গৃহে রত্ন প্রসবিয়া,

সংসারে রাখিলে অপূর্ব খেয়াতি,

( যুগল রতন ) কোলেতে লইয়া

১৯

স্থখে থাক, মাতঃ ! মনে রেখ যেন,

করিও প্রার্থনা আমাদের তরে,

তোমার মঙ্গলে সমস্ত মঙ্গল,

তাতেই, মা ! এত আহ্লাদ অন্তরে ।

২০

তোমার যুগল পুত্র কন্যা ধন্য ;

উজ্জ্বলিত হ'ক সাহিত্য সংসার ;

উজ্জ্বলিত তুমি হ'য়েছ এখনি ;  
অতুল উন্নতি হউক তোমার !

২১

কুমার-স্থাপিত সাহিত্য-সমাজে  
বর্ষে বর্ষে যেন ফলে সুধা-ফল ।  
বর্ষে বর্ষে বঙ্গ সাহিত্য-সরসে  
ফুটুক অপূর্ব নূতন কমল !

২২

ভাই ভগ্নী দুটি দীর্ঘজীবী হ'য়ে,  
সাধুন বঙ্গের মহতী উন্নতি,  
আশ্চর্য্য কখন, অপূর্ব মিলন ;—  
এক গৃহে যুগ্ম লক্ষী সরস্বতী ।

২৩

হেন কন্যা পুত্র যাঁহার গৃহেতে,  
ধন্য সেই পিতা, মাতা গুণবতী ।  
কুলের গৌরব রাজেন্দ্র ধীমান্,  
কুল-লক্ষ্মী-রূপা কৃপাময়ী সতী !

২৪

দেবি কৃপাময়ি ! কুমার রাজেন্দ্র !  
তোমাদিকে কভু দেখিনি নয়নে,



পিঞ্জরের পাখী দেশান্তরে থাকি,  
দেখিব যে কভু আশা নাই মনে ।

২৫

দূরদেশে থাকি, মনশ্চক্রে দেখি,  
মুক্তা হইয়াছি তোমাদের গুণে,  
তোমাদের স্নেহ সাগরের মত  
অনন্ত অসীম ; বর্ণিব কেমনে ?

২৬

প্রাসাদ, পর্য্যঙ্কে থাকিয়া তোমরা  
কুটীর-নিবাসী দুঃখী ভিক্ষাজীবী  
দম্পতিকে মনে কর ; সর্বক্ষণ  
বিস্মিত হৃদয়ে এই মাত্র ভাবি !

২৮

তোমাদের স্নেহ নিস্বার্থ নির্মল,  
—নন্দন বিধৌত অমৃতের ধারা,—  
হৃদয় প্রবাহে হ'য়ে প্রবাহিত,  
স্বর্গীয় স্নেহেতে ভাসিতেছি মোরা !

২৯

স্নেহে থাক ভাই, স্নেহে থাক ভগ্নি,  
দুঃখী দম্পতিরে রে'খ যেন মনে ।

বঙ্গের দুর্দশা করিতে মোচন  
দীর্ঘজীবী হয়ে থাক দুই জনে ।

৩০

হুস্থ বঙ্গভাষা, বঙ্গীয় সাহিত্য  
তোমাদের দ্বারা হইবে উন্নত,  
হেন আশ্বাসেতে বাঁধিয়াছি বুক !  
নিদ্রিত হৃদয় হ'য়েছে জাগ্রত !

৩১

দেবের দুর্লভ কবিত্ব-কুসুম  
ফুটুক নিবিড় কণ্টক কাননে ।  
তথাপিও যেন না ফুটে—না ফুটে  
হেন দক্ষ ভস্ম বঙ্গের উদ্যানে !

৩২

কিংশুকেতে আর পারিজাতে যথা  
তারতম্য কেহ বুঝিতে না পারে,  
যে দক্ষ দেশেতে, কাচ কাঞ্চনেতে  
নাহিক প্রভেদ ; সমান কদরে

৩৩

স্বাটিক মাণিক বিকাইয়া যায়,  
সাগর গোপ্পাদে সমান যেখানে,

মৃগেন্দ্র, শৃগাল, দেবতা, চণ্ডাল,  
সমস্ত সমান করে যেই স্থানে ;

৩৪

সে দেশে কবিত্ব কেন বল দেখি ?  
কবিত্ব তথায় বিপদ বিশাল !  
প্রায় সপ্তকোটি মানুষ্য যে দেশে,  
সে দেশের কবি অন্নের কাঙ্গাল !

৩৫

তাহাতেই বলি কাজ নাই আর !  
কাজ নাই আর কবিত্ব বস্ত্রেতে,  
যেমন আঁধার, থাকুক তেমনি ;  
কেন বিদ্যুদ্দাম নয়ন ধাঁধিতে ?

৩৬

মরুভূমে কেন ফুটিয়া কুসুম  
শুখায় রবির প্রথর কিরণে ?  
বন্তের কুসুম বন্তে শুষ্ক হ'য়ে  
থ'সে পড়ে, কেহ দেখেনা নয়নে !

৩৭

বড় মনস্তাপে বলিতেছি, ভাই !  
এ দেশে কবিত্ব বিড়ম্বনা সার,

বড় মনস্তাপে বলিতেছি, ভগ্নি !

বঙ্গে কবি জন্ম কাজ নাই আর ।

৩৮

এ দক্ষ দেশেতে তোমরা দু'জন

স্বর্গীয় শীতল প্রবাহ স্রুধার,

তোমাদিগে দেখে, দক্ষ হৃদয়েতে

হ'য়েছে প্রভূত আশার সঞ্চার ।

৩৯

এ দক্ষ দেশেতে তোমরা দু'জন

মরুভূমে পদ্ম, পিপাসার নীর, "

তোমাদিগে দেখে বাঁধিয়াছি বুক,

ব্যাকুল হৃদয় হ'য়েছে স্থস্থির ।

৪০

এ দক্ষ দেশেতে তোমরা কবির

বিপদে সহায়, দুর্বলের বল,

নিদাঘ-উত্তাপে এ দীর্ঘ প্রান্তরে

তোমরা কবির শ্রান্তি-তরুতল ।

৪১

ভীষণ নৈশিক অঁধার গগনে

একটি নক্ষত্র তোমরা দু'জনে,

ভুবনমোহিনী প্রতিভা ।

সংসার-সাগরে কবি-কর্ণধার,  
তাই লক্ষ্য করি' যা'বে লক্ষ্য স্থানে ।

৪২

অশেষ গুণের আধার তোমরা ।  
দুঃখী আমি কিছু নাই ত আমার !  
আছিল হৃদয়,—তাহাও দিয়াছি,  
এখন দিতেছি আত্ম-উপহার !

~~~~~  
সম্পূর্ণ ।  
~~~~~

## শুদ্ধি পত্র ।

---

পৃষ্ঠা	পংক্তি	অশুদ্ধ	শুদ্ধ
৯	১৬	ঔরষ	ঔরস
১৫	৫	নিষ্পন্দ	নিষ্পন্দ
ঐ	১২	কোটা	কোটি
ঐ	১৬	চিৎকার	চীৎকার
২৬	১৫	যুবরাজ	যুবরাজ
২৯	৮	ভস্ম	ভস্ম
৫০	১	যানে	জানে
৫৬	১৬	পাপির	পাপীর
৫৯	১৩	সংসার ?	সংসার !
৬৬	১২	সমুদয়	সমুদয়
৭০	১৫	বজ্রমুষ্ঠাঘাতে	বজ্রমুষ্ঠ্যাঘাতে
৭২	১১	অপস্ত্রা	তপস্ত্রা
৮৪	৭	‘জুড়ি’	‘যুড়ি’
৯২	২০	দেছিতেছি •	দেখিতেছি
১১৪	৭	কারণ্যাদি	করণাদি
১২৪	৫	প্রাতি ভক্তি,—	প্রীতি-ভক্তি,—
১২৬	১০	ভিক্ষাজীবী	ভিক্ষাজীবী
১২৭	৪	দুঃস্থ	দুঃস্থ

















